

# Mareko

## *Yohane Ra Qelanjange*

<sup>1</sup> Papiia iwa oŋo, eŋe Anutu wane gipole Yesu Kristo, eŋane sigi maep kieke ra wakonmaike.

<sup>2</sup> Mikepka, Anutu wane qelit ŋei, Isaiango, Yesu Kristo wane sigi maep kieke iwa yale qeke,

“Anutunjo rake, ‘Ge detnom! Na ŋei mane biraka more qebinkawe, oŋo nanane don kisi ra qelanjaniake, so geŋane numa maki wako-niake, so alakane gine more uratanjone ma ewekeake.’ <sup>3</sup> Kepe yaup papaino didi sawan ŋeiine midaine, yewao ŋei yewa eŋe mere, ŋei mane wane aŋa, ŋei ŋerep boka edora more edane rake, ‘Ŋine Waom wane numaine mauluke more kito ma koboeu wesake digin qekep!’ ”

<sup>4</sup> Rakiso, naso kutno Yohane eŋe kepe yaup papaine didi sawan ŋeiine midaine yewao wakone doku tauone more binjek don iwa yale boka edange, “Ŋine gege mage me masi tanik kine kine ŋine gotkoine korop qeligeu paki wet mainge more ŋadekkausō na doku tauŋunikale. Pakiso, Anutu eŋe ŋinane borikine ŋine yewa yaleka qelingi nigetkayake.” <sup>5</sup> Yale raki dere more, ŋei ŋerep louloutne, Yuda kepeo ŋine so Yerusalem mat suaino ŋine, warage Yohane wane don desikei wane arikoi. Eŋe dere more borikineene ra qelanjane wet maingeuso, Yohane eŋe Yordan dokuŋo tauonge.

<sup>6</sup> Yohane enj e iwa yale geokange. Takotine kamel ea wane zounenjo mamaine, ea bira more so radeune kebanjo makatake more, njaraine kubon so begok zikotno njine eanoka nemanke. <sup>7</sup> Yohane enj e binjek don nej nrep iwa yale edange, “Nei mane njadeno sariake. Enjane zonominejo yemo nanane zonom yuannanmaike. Na nej bile mida namde enjane qelit qeqemeine, nonjo abon kite umatne kutno motpe mi rokopkeake. <sup>8</sup> No nonjo yemo doku taujunmaile, onjo yemo yale-waka Anutu wane Asu Koboboinenjo taujuniake.”

### *Yesu Doku Taukiso Nei Borikinenjo Liwekkake*

<sup>9</sup> Naso maneo Yesu enj e Nazaret mat qelige more, Galili kepeo njine Yordan dokuo sari lotkeki, Yohanenjo Yordan dokujo enj e taukake. <sup>10</sup> Taukaki Yesu enj e dokuo njine sa more, yewaka pore kaki, qeli ananji Asu enj e baluse nani yale ket Yesu enjine kutno kitoke. <sup>11</sup> Pakiso, Waom wane boka woka mane qeliwo njine iwa yale bokaki ketke, “Ge nanane gipon maepne, na wet-nenjo lukgane malip ganlukmaile.”

### *Satanjo Yesu Liwekkake*

<sup>12</sup> Eso naso yewaka Asujo Yesu ma birakaki, nej midaino kepe yaup papaino arike. <sup>13</sup> Ari more, ea goin kaiwe 40 geke, naso yewa nej midaine kepe yaup papaino, Nei Borikine, Borikine Welaine, Satanjo sari Yesu liwekkake. Yesu enj e osom zubaine enj erop geke. Pakiso anjelo edo sari qesinka more qelit qekakoi.

### *Yesujo Nei Etke So Etke Ebuke*

<sup>14</sup> Yohane eje mulap urumgo waketke, naso yewao, Yesu eje koso zinge Galili kepeo sari more Anutu wane binjek don ra edange. <sup>15</sup> Eje iwa yale rake, “Anutuño naso motke, ea mo iwa sari lotkemaik. Anutuño qeli ewe zonomine motke, iwa mo sarimaik. Njine borikine njine njadekka more, wet maingeu paki, binjek don iwa dere malipkau!”

<sup>16</sup> Yesu eje Galili doku namuñ wazaino ari more, Saimon so njole Andrea potki ariki otke. Ere zawon wane kamaga etne doku namuñ wazaino bira okorakoik Ere sola wane qesinj maratcakeik wane urataine yale naso banem togogleka manjkoik. <sup>17</sup> Naso yewao Yesuño erano lotke mo etora etane more rake, “Njire sari nanjane njadeno mogat nanbik! Njire zawon ebuebu wane kine detlukkoik, pakimo, nonjo nej njerep ebu ebu wane kine kito njiponikale.” <sup>18</sup> Rakiso, ere esatka kamaga qelige more, njadino mogare arikoik.

<sup>19</sup> Yesu eje eri eri ari more, eje Zebedi wane medewetkine, Yakop so njole Yohane otke, ere seki kutno mere kamaga maulukkoik. <sup>20</sup> Yesu eje ore more boka etoraki, so ere magaetne, Zebedi so urata medewekoune qelinj onbik, seki kutno metpi, so ere sari more Yesu wane njadino mogare arikoik.

### *Yesu Eje Nei Mane Wane Asu Qotkoine Mane Esopkake*

<sup>21</sup> Pakiso, Yesu ejine so dokoine ebuke, eje Kapaneam matko ari metkoi. Sarere kutno, zonom mama nasoo, Yesuño Yuda enjane lewa lewanj urumgo ari more, nej njerep binjek don kito

edange. <sup>22</sup> Nei n̄erep edo eᅇane miti kito ebo eboninane dere more, q̄isekoi so oᅇaene q̄aeki. Eᅇane kito ebon eboninane zonomineᅇo kau, Anutu papa togon welaine n̄ei, eᅇetene Skribe, eᅇane kito ebo ebon ea manerop yuanonge.

<sup>23</sup> Naso yewao, n̄ei mane asu qotkoiner̄o kotino wener̄ pake, ean̄o Yuda wane lewa lewan̄ urum koto saket more, oᅇo togoleka boka rake, <sup>24</sup> “Yesu, Nazaret matko n̄ine, ge dalino okan n̄onikenane? Ge n̄ene n̄engu matali n̄onikenane iwa sarimaine? Na detluk ganmaile! Ge n̄ei koboboine Anutuᅇo uratainane ra matoke birangangi Anutu eᅇino n̄ine sarimaine.”

<sup>25</sup> Yale rakiso, Yesuᅇo asu qotkoine yewa don okanka more olale rake, “Ge an̄an̄one ma waluke more n̄ei yewa qeliᅇ kanom!”

<sup>26</sup> Rakiso, asu qotkoiner̄o n̄ei togoleka rapap q̄epapkaki paki, suaine boka aro un̄anlan suaineka okane saket qeliᅇka arike. <sup>27</sup> Pakiso, n̄ei n̄erep eᅇe oᅇaene q̄aeki, done done au more rakoi, “Iwa onokaka? Kito ebo ebon musele me? Eᅇe zonominerop ra togole asu qotkoine edangi, eᅇe an̄aine tewekmami.”

<sup>28</sup> Ea wane, Yesu wane don kisiᅇo ari more esatka Galili kepeo korop rokokpeke.

### *Yesu N̄ei N̄erep Loutne Ma Menan̄onge*

<sup>29</sup> Yesu eᅇine so Yakop so Yohane eᅇe Yuda wane lewa lewan̄ urum q̄elige ket more Petoro so Andrea eretne matko koboine ari waketkoi. <sup>30</sup> Simon wane sewenine eᅇe zoma suaine okane, papaino paki solainer̄o zok manerop gereune okangi, n̄ei n̄erep edo ikopka Yesu olale rakoi,

“Simon sewenine, eɲe zoma manerop okane, solaine wikile zok manerop wakonkamaike.”

<sup>31</sup> Yale rau, Yesu eɲe eaka ari ɲerep metino ma qesiɲka more bukkaki wieke. Paki ɲerep ea eɲe solaine momo qe more menaɲkaki, eɲe eaka wie eɲane ɲara doku mauluke ebongi nekoi.

<sup>32</sup> Rarapko kepe deine qoe, ruo kereakane okangi, ɲei ɲerep eɲe zoma ɲei, so ɲei asu qotkoinerop, ea Yesu wano ebu sarikoi. <sup>33</sup> Mat suaine yewa wane ɲei ɲerep magu suaineɲo sari Simon wane mat tirino lewage qedugu metkoi. <sup>34</sup> Metpi Yesu eɲe ɲei ɲerep zoma kine kineenerop ma menaɲone more, kotoeno asu qotkoinerop, ea esoponge, esopongi asu qotkoine eɲe Yesu wane kineine detluk kakoi. Pakiso Yesu eɲe eɲane kine rau mi sua ariakane, ra wetonge.

### *Yesu Galili Kepe Ra Qelanange*

<sup>35</sup> Pakimo Yesu eɲe kepe qae qae wane goigoka panaman weneɲ wie ket, mat qeliɲka more, kepe ɲei midaine yewao ari mere meɲenkake.

<sup>36</sup> Meɲenka metki, Simon eɲine so kimakoune, eɲe baɲ ɲado zuaɲka ari maratkakoi. <sup>37</sup> Eɲe ari maratka more, iwa yale olale rakoi, “Nei ɲerep korop magu suaine eɲe ge zuaɲ ganmami!”

<sup>38</sup> Rauso, eɲe iwa yale mainge edange, “Iwamo ɲene mat suaine natne osop osop pamaike, ɲene ea lolike arikene, na eɲano weneɲ miti edanikalane nanmaike, na urata ea maikalane sarikole.”

<sup>39</sup> Yale ra edane so, eɲe Galili kepeo lolike ge mat baɲem Yuda wane lewa lewaɲ urum metke,

rokop miti edange, so asu qotkoine ea korop esoponge.

### *Yesuŋo Nei Mane Ma Menan̄kake*

<sup>40</sup> Nei mane kubet togonineropŋo Yesu wano wawetine qe qesonka more rake, “Ge nan̄ane simile ganmaikeo, yem ge maine nan̄ane kubetne iwa manom osiake!”

<sup>41</sup> Yale rakiso, Yesu eŋe eŋane wet borik ma more metine bira solaino uaka mo olatke, “Na geŋane simile nanmaike, ea wane kubetŋone iwa osikep!” <sup>42</sup> Olatkiso, esat naso yewaka kubet togonine ea osiki, solaine ea menage libe qeke.

<sup>43</sup> Pakimo Yesuŋo ŋei ea don kukka ra qebinka more, iwa yale olatke, “Ge detlukkenom! Ge ari solan̄one menan̄maike, ea wane donkisi ŋei mane misuk edanikene, asoze Moseno sogino iwa yale ra togoleke. Nei mane kubet togonine mo osi menan̄kakeso, eŋe mosop ŋei wano ari solaine sikankayake. Ge yalewaka mosop ŋei wano koboine ari more, solan̄one sikanka more bakom mannom paki arikene. Pakimo, ŋei ŋerep eŋe detgane raikei, eŋe solaine mo menan̄ kamaike.”

<sup>44</sup> Yale rakiso, Yesu eŋe don gereunerop olale qebinka birakaki arike.

<sup>45</sup> No ŋei yewa eŋe ari more, don kisi yau yaup ra edane ariki eŋane don kisi ean̄o sua korop kepe ban̄em rokopkeke. Pakiso, Yesu eŋe mat suaino ŋei ŋerep eŋane deeno koso mi ari lolikke, eŋe kepe ŋei midaino ari metke. Metkiso, ŋei ŋerep kepe ban̄em ŋine edoka Yesu wano sariman̄koi.

## 2

### *Yesuŋo Nei Mane Kie Metine Seuseune Ma Menan̄kake*

<sup>1</sup> Yesu eŋe kaiwe mama karewe yewa geki qoekiso, Kapaneam mat suaino zinge ari lotkeke. Pakiso, naso yewao ŋei ŋerep edo don rau yauyaup ariki rakoi, “Yesu eŋe mo koso i sari matino metmaike.” <sup>2</sup> Paki ŋei ŋerep eŋe esatka mat yewa wane kotino watke madetko so mat wazaino korop rokop ketwarekoi. Kepe amenjine mane yaup mi pake. Naso yewao Yesu eŋe binjek don edane okoraki, <sup>3</sup> ŋei etke so etke eŋe zoma ŋei kie metine seuseune mane teweka sarikoi. <sup>4</sup> Mat mo ŋei ŋerep edo watke warekoi wane eŋe dalino Yesu wane osino ma waurap. Njan̄æ more, tiriwoka teweke wa mat bakino Yesu metke kutnoken yewa kito barake more ŋei etke so etke eŋe mulapkoka mau qoron̄ qoron̄ ket zoma ŋei ea eŋe teweinerop Yesu wane osino rasu pake. <sup>5</sup> Yesu eŋe kan̄ qae wie pore ŋei etke so etke, eŋe one more eŋane mali malipene detone more Yesuŋo zoma ŋei olale rake, “Medepna, na geŋane masi qotkoine makone eamo ma qelin̄kawe arimaike.”

<sup>6</sup> Yale ra olatkiso, Anutu papa togon welaine ŋei natne, Skribe, eŋe Yesu wane osino mere detpi, dereretene mi kopkeke, <sup>7</sup> “Dalino wane ŋei yewa eŋe don yaline ramaike? Eŋe Anutu yuanka more eŋane met met mayakane okanmaike me? Eŋe detki eŋine Anutu yale okanmaike? Ŋei manen̄o mane wane sot maine mi qelin̄kayake, Anutu wekuŋo ŋei mane wane sot turuŋ qotkoine ea makoke ma menan̄ ŋoniake!”

<sup>8</sup> Yesu enje yewaka dereretene detone more, iwa yale edange, “Onoka wane nje dereret yaline detmami? <sup>9</sup> Na zoma nje yewa don ewekine dalino yale olasikale? Na olale raikale, na sotjone mo qelinkawe siukamaike, me ge wie menage more uamjone ma more arinom? <sup>10</sup> Ea wane nje na detluk nanbi, na Nei Wawainane Gipole. Na nae tunno kepeo nje njerep enjane sotene eamo qelinkawe suikwaremaike.” Yesu enje yale ra more, zoma nje olale rake, <sup>11</sup> “Wie, uamjone ma more matjono arinom!”

<sup>12</sup> Pakiso, zoma nje yewa enje nje njerep enjane kaiteno ikopka wie more, uamine rutupke more, kolopke ket arike. Nei njerep enje korop onjaene qaekiso Anutu wane enjetine ora bukeu waki rakoi, “Sogino kine kine mane iwa yaline mi kakone, i midakaka!”

### *Yesu Lewi Orake*

<sup>13</sup> Yale rauso, Yesu enje koso Galili doku namuj mezeno zinge arike. Ariki nje njerep magu suaine enje sari Yesu wano qeduguwi enje miti don kito edange. <sup>14</sup> Yesuno enje ea njine ari more, Lewi enje takis wesi mama mat koto metki olale ka more rake, “Lewi ge ket njadeno mogatnane sarinom!” Raki, Lewi enje yewaka wie more, wesi mama urataine ea qelige more, eaka Yesu wane njadino mogatka arike.

<sup>15</sup> Pakiso, boanj Yesu enje Lewi wane matko njara mere neke. Naso yewao takis mama nje loutne so nje sotenerop natne enje Yesu enjine so dokoine enjerep wenenj mere njara nekoi. <sup>16</sup> Ne metpi, naso yewao Anutu wane papa togon welaine nje

natne, Parisi, eɲe Yesu kau takis mama ɲei so ɲei sotenerop eɲe weneɲ metki one more, Yesu eɲine dokoine qeson one more rakoi, “Eɲe eamo onoka wane ɲei qotkoine eɲerop mere ɲara nemaikɛ?”

<sup>17</sup> Rauso, Yesu eɲe detone more rake, “Maɲo mauluk mauluk ɲei eɲane ari okanmaikɛ? Zomaenerop, me, zomaene midainɲo? Na ɲei yaline eɲane ra more sarikole. ɲei sotenerop zuaɲone more ebu qesiɲ onikalane sarikole. Na ɲei dereretenane detpi koboine okanmaikɛ, eɲe qesiɲ onikalane mi sarikole.”

### *Sawe Gege Wane Yesu Qesonkakoi*

<sup>18</sup> Naso maneo, Yohane doku tau tau wane dokoine so Anutu papa togon welaine ɲei, Parisi, eɲane dokoene eɲe ɲara sawe gekoi. Naso yewao ɲei ɲerep natne eɲe sari Yesu qesonka rakoi, “Yohane wane dokoine so Anutu papa togon welaine ɲei, Parisi, eɲane dokoene eɲe ɲara sawe gemami. ɲo, daleo wane geɲane dokoɲone eɲe yale mi okanmami?”

<sup>19</sup> Yale rauso, Yesuɲo mainge more edane rake, “ɲei mane eɲe zokit mayakane rayakeo, ɲei kima kounɛ, eɲe maine ɲara sawe mesikɛi mɛ? Yale mida, eɲe zokit mayakane okaniakeo, ɲei kimakoune eɲe maine eɲerop ɲara oi bakom weneɲ mesikɛi, so kimakoune eɲe ɲara wane sawe mane mi okanikɛi. <sup>20</sup> Na ɲei qaluwit yewa eɲane rokop. Baɲ, naso maneo ɲei edo na neuwi ariwe dokone eɲe koso na mi nanikɛi, naso yewao eɲe maine ɲara wane sawe gekɛi.”

<sup>21</sup> Yesu eɲe koso takotke rokop don mane rake, “Takot mane toeki aɲaine okoraki laplap

musele mane wane sisinejo more maine mi qetusikene. Yewa siluṅ qetusikeneo, yemo lap lap sisine muselenjo tebakaki, takot sogine ea toe aṅap suaine wakoniake. <sup>22</sup> No mane maṅo wain musele ea qeki koso nomare sogine yewao kesiake. Eṅe yalewa okangi, yemo wainjo ket qe-binkaki, nomare ea muzugeake. Pakimo, nomare so wain ere weneṅ mida lelekeik, ea wane wain musele eṅe eṅine nomare muselo ketki, eamo menageake.”

*Yesu Eṅe Qezarek Naso Nei Edo Qesonkakoi.*

<sup>23</sup> Qezarek naso maneo, Yesu eṅine so dokoine eṅe wit eu kotinoka ari more dokoine edo wit wele natne siwekoi. <sup>24</sup> Pakiso, Anutu papa togon welaine ṅei, Parisi, edo one more Yesu qeson kakoi, “Ge onnom! Geṅane dokoṅone eṅe wit siwe nemami. Dokoṅone eṅe masi yewa ṅenane ra rokop dongo yemo okane more sot kaukmami. Qezarek naso yewao mi maikei, yewa ṅenane ṅabozane rara togon don.”

<sup>25</sup> Yale rauso, Yesuṅo donene mainge edange, “Mo sogino asoze Dawit, Israel Ware Ware, eṅine so dokoine eṅe ṅaraenane seuke more <sup>26</sup> ari Anutu wane Bakom Urum koto waket more, bret yewao ṅine mi mamaine, eamo ra togoleke, ea ma nekoi. Bret yewa Anutu wane bakom kitokenane. Naso yewao, Abiata Anutu wane mosop ṅei eṅe lewet geke. ṅenane ra rokop don ra togoleki mosop ṅei edoka bret yewa ne okangoi, ṅo Dawit eṅe yewa ne more dokoine ebongi nekoi.”

<sup>27</sup> Yesu eṅe koso edange, “Anutu eṅe mikepka ṅei so ṅerep ma wakonotki paki, erane ra more

ɲadino qezarek naso yewa baɲ motke. Qezarekɲo mawakongi paki, ɲei so ɲerep mi ma wakonge, naso yewaɲo ɲei ɲerep qesiɲ osiakane motke. Me naso yewaɲo ɲei ɲerep matali osiakane mi motke. <sup>28</sup> Ea wane, na Ɗei Wawainane Gipoleɲo yalewaka qezarek naso ea wane Waom, so noɲo ea wane welaine.”

### 3

#### *Yesu Eɲe Ɗei Mane Metine Marap Maraune Ma Menan̄kake*

<sup>1</sup> Naso maneo, Yesu eɲe koso zinge ari Anutu wane lewalewaɲ urum koto waketke. Ɗei mane yewa metke, eɲe metine nat paromineɲo setneka marap maraune. <sup>2</sup> Ɗei natne eɲe Yesu kau sariki diamine mau paki, iwa yale rakoi, “Yesu eɲe qezarek nasoo zoma ɲei metine marap maraune iwa maine ma menan̄ kayake me mida. Eɲe ma menan̄ kayakeo, yemo ɲene Yesu dongo birakaikene.” <sup>3</sup> Yesu eɲe zoma ɲei yewa metine borikine, eɲe olale more rake, “Ge metenone borikine, yalinane iwa wie sari okoranom!” <sup>4</sup> Pakiso, eɲe ɲei ɲerep qeson one rake, “Ɗenze ra rokop don eɲe qezarek nasu wane don dalino mawalukke? Masi maine maikene me gotkoine? Ɗene ɲei ɲerep gegeene ma menan̄ onikene me ɲei ɲerep engunem seukkei?”

Qesonongi, edo dere more don mane mi mainge olatkoi. <sup>5</sup> Pakimo Yesu eɲe deine pore lo-like more ongi eɲe dereretene won geki doneene midaine metkoi, ea wane Yesu eɲe ikopka sotine osiki koso dere umare onge. Pakiso, Yesu eɲe

zoma ñei olale rake, “Ge metenone birakanom!” Eje metine biraki, eaka ikopka menanņkake. <sup>6</sup> Yale okangiso, Parisi eje ikopka Anutu wane lewa lewanj urum qelinķa more wie saket ari Herot wane tego enerop lewage more, Yesu eje numa ea me ea maratka more qeu seukeakane done aukoi.

*Kepe Banem Ñei Nerep Eje Yesu Wano Sarikoi*

<sup>7</sup> Yesu eje dokoine enerop wie mat yewa qeligeu paki, Galili wane doku namunj pamaike, yewa arikoi. Pakimo ñei ñerep magu tego kakapa suainenjo wie eje mogatka arikoi. Ñei ñerep magu suaine yewa eje kepe banem ñine sarikoi. <sup>8</sup> Galili kepeo ñine, Yuda kepeo ñine, Yerusalem mat suaino ñine, Idumia kepeo ñine, Yordan kepe sasaino ñine, Tire so Sidon kepeo ñine. Ñei ñerep magu suaine yewa eje Yesunjo urata kine kine maki detka more enano sarikoi. <sup>9</sup> Magu suaine zok manerop Yesu watke more, gitit kaikei wane okanbi eje dokoine enane rake, “Ñine ari seki mane ikopka mauluke ma sariu, yaup warenan metkep! Ñei ñerepnjo magu suaine okanbi, so na ea wane kutno wa more toe, ñei ñerep biraone eri kere, amanj naeka toe mesikale.” <sup>10</sup> Sogino mo Yesu eje ñei ñerep loutne ma menan onge, ea wane ñei ñerep zomaenerop eje edom meteenenjo solaine makei wane onge, pakimo ea wane eje kimakopeene qepodon onbi sari, Yesu sola takotino uakaikei wane okangoi. <sup>11</sup> Naso natneo ñei ñerep asu qotkoinerop eje Yesu ka more ari kepeo ket rasu pa more boka aroke ora rakoi, “Ge, Anutu wane Gipole!”

<sup>12</sup> Yale rau, Yesu eņe asu qotkoine togogoleka ra togole ongi paki eņe ma, ea tingo me didiwo eņane eņetine zok mi rau suayakane rawetonge.

### *Yesu Eņe Dokoine 12 Ebuke*

<sup>13</sup> Pakiso, Yesu eņe weti bonagao wake, naso eao wie more, ņei natne eņerop gekei wane ma wakononge, ņei ea eņe edoraki eņano sarikoi.

<sup>14</sup> Pakimo eņe ņei magu 12 ma wakononge, ņei yewano eņinerop gekei wane, ma wakon one more, eņeteene aposolo edorake, so eņe bira ongi ari ņei ņerep eņano biņek don ra qelajanikei wane rake. <sup>15</sup> Yesu eņe ņei 12 yewa eņine tungo asu qotkoine esop onikei wane zonom takot onge.

<sup>16</sup> Yesu dokoine eņane eņet tegoene iwa yale ebonge. Simon, eņetine mane Petoro orake.

<sup>17</sup> Zebedi wane gipole Yakop, eņine so ņole Yohane, erane eņeteetne mane Boanerges etorake. Eņet yewa wane kine, quruņ qilap.

<sup>18</sup> Andrea, so Pilip, Bartolomu, Mataio, Tomas, Yakop, Alpius wane gipole, so Tadius so Saimon Zelot. <sup>19</sup> Ⱥo Yudas Iskariot, ņei yewano Yesu ņaba eņane meteeno masi qotkoine okan kaikei wane ma wakonka birakake.

### *Ⱥei Eņe Rakoi Yesu Eņe Belzebulrop Urataine Mamaike*

<sup>20</sup> Pakiso, Yesu eņe matko ariki ņei ņerep magu suaineņo eņano koso sari lewanņoi. Ea wane Yesu, eņine so dokoine eņe qeka more, dalino ņara mane neurap. <sup>21</sup> Yesuņo kine kine okange so make, ea wane tego tanik manik ea ņei eņe ra suau dere more weneņ tutulekoune, eņe Yesu

ma walukka more, iwenkaikei wane sarikoi. Tutulekoune eje iwa yale rakoi, “Eje mo qelan qemaike!”

<sup>22</sup> Anutu papa togon welaine jei natne, Skribe, eje Yerusalem jine ket more rakoi, “Eje kotino Belzebul, ejetine mane Satanjo okoramaike. Eje Belzebul wane zonomgo so onjo qesinjaki, asu qotkoine ea esoponmaike, eajo asu qotkoine ejane ware ware.”

<sup>23</sup> Eje yale rauso, Yesu eje edoraki osino sari metpiso don rokop mane more edane rake, “Satan onjomka dalino Satan osop kayake? <sup>24</sup> Jei njerep kaunsol mane wane magu eje wiri magu etke okane more yakukei, kaunsol ea wane zonomine eamo midayake. <sup>25</sup> No jei urumene weku eje wiri more magu etke okane more kawali yakukei, jei yewa eje koso togole qeturage maine weku mi lele gekei. <sup>26</sup> No Satan eje ejine magu njaba okan oniake, eje wiri more zonomene midayake.”

<sup>27</sup> Yesu eje koso don iwa yale takotke rake, “Satan jei zonomine suaine, ejane urata wane abonj kine kineine yaup maine mi ari maikene, yemo midakaka. Mikep ejine kie metine wokomka more njado maine ejane mat koto wa more, urata wane abonj kine kineine pamaike, yewa matali onikene.

<sup>28</sup> Na jine don wele iwa yale njidanbe, Anutu eje jei njerep ejane masi tanik qotkoine kine kine so don dereret borikine ramami, yewa eje korop qelingi siukeake. <sup>29</sup> No jei mane eje Anutu wane Asu Koboboine ra matali okan kayakeo, yemo ukude Anutujo ejane sot ea mi qelingi

siukeake. Eɲane borikinane sot turuɲ ea qoi qoine midaine motki pamageake.” <sup>30</sup> Yesu eɲe don yale ra edangane Anutu wane papa togon don welaine ɲei eɲe rakoi, “Yesu eɲe mo kotino asu qotkoinenjo ketke okoramaike.”

### *Yesu Wane Nagaine so ɲonqakoune*

<sup>31</sup> Naso yewao Yesu wane nagaine, so ɲonqaine eɲe sari lotke more mat wazaino okora more don motpi wake, Yesuɲo saket oniakane. <sup>32</sup> Pakimo, ɲei ɲerep magu suaine eɲe Yesu lolikka metkoi, edo olale rakoi, “Ge detnom! Geɲane naganone, so ɲonqakopɲone eɲe qeimat, mat wazaino okora more goɲo kesikenane ramami.”

<sup>33</sup> Yalewa rau, Yesu eɲe mainge edane rake, “Maɲo naɲane nagane, so ɲonqane?” <sup>34</sup> Eɲe deine ɲei ɲerep lolikka metkoi, eɲe one more, enanoka pore ongi paki rake, “Onbi! Iwa edo naɲane nagane so ɲonqane okanmami. <sup>35</sup> ɲei me ɲerep mane eɲe Anutu wane don dere eɲane simile mogasikei, ea ɲo naɲane nagane so ɲonqane okanmami.”

## 4

### *ɲei Mane Eɲe Euo Waet Ebotmaike Eɲane Don Rokop*

<sup>1</sup> Pakimo, Yesu eɲe koso kito ebo ebon urataine takotke more, Galili doku namuɲ wane qalakino ɲei ɲerep kito ebonge. Pakiso ɲei ɲerep zok tego suainenjo sari eɲano manerop lewage more watke Yesu lolikkau eɲe kepo qelige ari seki mane kutno wa more ɲei ɲerep biraone weti toe namuɲgo wa eɲineka metke. Metkiso, ɲei ɲerep magu eɲe

qalakino lewage okorakoi. <sup>2</sup> Eje yalewa okorau, Yesu eje don rokop mane kito more edane rake,

<sup>3</sup> “Ñine detpi! Ñei mane eje euo wit ebosi-akane arike. <sup>4</sup> Eje wit woune natne euo ebotke, pakimo, natne ari numao kito metki nanj edo sari nekoi. <sup>5</sup> Woune natne ari kepe wesi tabilainerop kepe ewekine yewa wane kutno ket kito ikopka poripke wiekoi. <sup>6</sup> Wane kaiwe suaine sa more wit komine yewa ezoke. Ndoene yewa qei mi ketlukke kepe wesi tabilainerop ea wane komine ururuke seukkoi. <sup>7</sup> Wit woune natne touk okolerop ea wane koto ket kitokoi. Wane touk okolerop yewano ikop wie more pise walip onge. Walip ongisu, wit wele maine mi qekoi. <sup>8</sup> No, wit woune natne kepe gukinerop yewao ket kitokoi. Ket kito more, komine poripke sua more wele maine qekoi. Wele natne 30, natne edo 60, natne edo zok 100 yaline qekoi.”

<sup>9</sup> Ea wane Yesu eje edange, “Ñei me ñerep mane eje ketineropno yemo don iwa dere malipka more, kine detlukkkayake.”

### *Don Rokop Wane Masi*

<sup>10</sup> Ñei ñerep magu suaine eje biraone ari warekoi, naso yewao Yesu enjeka metki, enjine dokoine 12 eje so ñei natne mo Yesurop wenen ge okangoi, eje Yesu wane don raki detkakoi, ea wane enano sari qesonka rakoi, “Ge don rokop more rene ea ra qelanjane ñedannom detjem.”

<sup>11</sup> Yesu eje mainge rake, “Anutuño don sanine so qeli ewe zonominane kine so ñine dalino ware ñunmaike, na ñine ea desikei wane ñidanmaile. Ñei ñerep natne ñadino gemami eje nanjane don,

ea don rokopkoka kito more edan edan wane raraine, ea wane rokop na korop kito edanbe, eje detwaremami. <sup>12</sup> Yalewa wane, 'Eje deeneño kaikei, ño, eje kine kine maine mi kau qelanjaniake. Eje keteneño maine desikei, ño, eje kine maine mi detlukkei, so weteeno mi maingeu, soteene pa eboniake. Ea wane eje wet maingeu, Anutuño eñane sot qelingi siukeake.' "

*Yesu Eje Wit Woune Ebo Ebot Wane Donkisi Kine Ra Qelanjange.*

<sup>13</sup> Pakiso, Yesu eje qesonone rake, "Ñine don rokop kito more rele, yewa koso maine weneñ detlukkamami me? Pakimo, ñine don rokop korop yewa wane kine dalino det lukkaikei? <sup>14</sup> Ñei wit woune ebotmaike, ea eje Anutu wane don oñom ebotmaike. <sup>15</sup> Woune natne dumao ket kitoke, ea yemo ñei ñerep natne eje Anutu wane don detpi, kotoeno ketki, nasomde bangoka, Satan eje sari Anutu wane don ea ñei ñerep natne eñane kotoeno yasoke, ea ma biraki saket ariake. <sup>16</sup> Woune natne kepe kutka, wesi tabila weneñ, ea wane kutno ket kitoke, eamo ñei ñerep natne eje Anutu wane don ikop dere ma more bakom kitokei. <sup>17</sup> Ño, eje ñodine qeirop mi ket ma qotke mesiake. Eje kutka metki, ñaba edo biñek don wane umat natne wikilerop ebonbi, eje koso Anutu ñadekkaikaikei. <sup>18</sup> Woune natne eje touk okolerop ea wane keune ket kitokoi, eamo ñei ñerep natne eje Anutu wane don detkoi. <sup>19</sup> Ño, kepe kutno gege wane umat so wesi aboñ suaine maratka maratka, so kine kine natne, ea wane

bailalan, eajo nei n̄rep ējane kotoeno waket more, Anutu wane don kotoeno piseka more ma qorokka more, ma pelek kaki siukke, ea wane wele maine mi qekoi. <sup>20</sup> N̄o woune natne kepe kelokinerpko eao ket kitokoi, eamo nei n̄rep natne ēje Anutu wane don dere more malipka lukeu paki, ma qotkakoi. Ea wane ēje wele maine qekoi, wele natne 30, natne 60, natne 100 yale qekoi.”

### *Don Sane N̄ado Didiwo Wakoniake*

<sup>21</sup> Pakiso, Yesu ēje koso rake, “Nei mane kiwa kuake more diao qeki okorayake? Lase bano me rosaño more supaki mesiake? Mida! Ēje kiwake more qeki zake kutno didiwo okora korop qelan̄anoniake. <sup>22</sup> Yalewaka, kine kine korop sane pamaike, ea na n̄ado didiwo mawe wakon wareake. So kine kine natne supawe metmaike, ea n̄ado na ma lalagewe didiwo wakon wareake. <sup>23</sup> Nei me n̄rep mane ēje ketinerop̄ño don iwa wane kine dere more malipka lukki paki, korop detka wareake.”

<sup>24</sup> Yale ra more ēje koso edane rake, “N̄ine dere more kaulukkei! N̄ine nei n̄rep ējano urata kine kine mauluke ebonikeiwo, Anutu ēje yalewaka n̄ine mauluke n̄ibone more koso manerop takotke yuanka mauluk̄une n̄iboniake. N̄o, n̄ine nei n̄rep matali ebonikeiwo, Anutu ēje n̄ine yalewaka matalīune more koso manerop yuanka matalīune n̄iboniake. <sup>25</sup> Anutu ēje nei me n̄rep mane kine kine mo mangi make, ea togoleka malipka geakeo, ēje koso takotke mane more ma sua maniake. N̄o, nei mane ēje Anutu

kine kine nigatne mange, ea mi mauluke wareka mageakeo, yemo Anutu eje ɲei yewa wane kine kine mange, ea koropka omaka wareake.”

*Woune Kominerop Ea Wane Don Rokop*

<sup>26</sup> Yesu eje koso rake, “Anutuɲo ware ɲunmaike, ea wane tanikine iwa yale. ɲei mane eje kine kine woune euo ebore more, <sup>27</sup> eɲine matko ari toma geake. ɲo eje mi detkamaike, wele dalino eu koto wakonmaike. Pakimo, woune ea eje poripke sayake. <sup>28</sup> Saki, kepe oɲomka komine mapitkaki sua wele geake. Mikepka kau saraine so pizulumine. ɲadino wit wele wakone more menage laɲeniake. <sup>29</sup> Wit wele laɲengi, ɲei eje kieke pilaɲɲo kitatmaike.”

*Anutuɲo Wareɲuniakane Kine Yesu Eje Ea Wane Don Rokop Motke*

<sup>30</sup> Yesu eje koso takotke more ɲei ɲerep qesonone more rake, “Na Anutuɲo wane miti me qeli ewe zonom wane numa ea mo kine kine mane onokakao rokop kitowe, takotke more ra qelaɲanikale? <sup>31</sup> Eje eamo mastet woune yale, nigatnemde okanmaike. Mastet woune nigatnemde kine kine natnane woune me waetne yuane more zok manerop, nigatne okanmaike. Yalinane mastet woune ea ɲei manɲo euine ebotke. <sup>32</sup> Pakimo, eje poripke more, sua eu kotino ɲara nenine natne korop yuanone more, eje wie weti wa qogine qe mesiake. Pakimo, naɲi eje sari wa more naune koto matene kito more mesikei.”

<sup>33</sup> Yesu eje don rokop kine kine loutne iwa more ɲei ɲerep ra edange. ɲei ɲerep edo dere

qelanjanikei wane Yesu eɲe dereretene rokouno edange. <sup>34</sup> Yesu eɲe ɲei ɲerep don rokop eaka edane okange. Ɗo, eɲe dokoine eɲerop mere more, don rokop wane kine ra qelanjane edane okange.

### *Yesu Eɲe Dibom Ma Peseke*

<sup>35</sup> Naso mane kepe qoiqoiwo, Yesu eɲe dokoine edane rake, “Ɗene sekiwo wa more, doku namuɲ kitare erinat ariɲem.” <sup>36</sup> Raki, eɲe ɲei ɲerep magu suaine yewa qeliɲone more, Yesu alakane wa metkiso, dokoine eɲe ɲado seki yewa wane kutno wa more, eɲe weneɲ ma ariuso, seki natne eɲe weneɲ eɲerop arikoi. <sup>37</sup> Ariu, ikopka dibom suaine wie more seki koto kiwet qakki ket watke ma murugeakane okange. <sup>38</sup> Yesu eɲe seki sotno qaliɲan more kulu pake. Dokoine eɲe ari ma wirikka rakoi, “Kito ɲebo ɲebon ɲene zok bori more seukkenane okanmaine! Ge onoka wane mi det ɲonmaine?”

<sup>39</sup> Yesu eɲe wie more togoleka kuroge momo olatke, “Doɲ mannom!” Ra more eɲe dibom olatke, “Ge, tikɲane doɲ mane panom!” Rakiso momo eɲe doɲ mangi, so dibom eɲe yaleka tik doɲ mane kalon suaine pake. <sup>40</sup> Pakiso, Yesu eɲe dokoine edane rake, “Ɗine onoka wane kaet okanmami? Ɗine malip malipɲine mida me?”

<sup>41</sup> Eɲe kaet suaine okane more, enɲene auye rakoi, “Ɗei iwa eɲe zok ɲei kine mane! Naso bano ɲei ɲerep zoma kubetenerop so asuene qotkoine ma menaɲonge, wane koso iwa momo so dibom suaine iwa don etangi, ere done detka more qeliɲmamik!”

## 5

### *Yesu Eje Nei Mane Wane Asu Qotkoine Osopkake*

<sup>1</sup> Kalon okangi, Yesu so dokoine eje Galili Namun erinat ari lotkekoi, kepe yewa enetine Gerasa. <sup>2</sup> Yesu eje seki qelinka ketki, yewaka nei mane eje denesere wane kezem anaino yine sari qalakko okoraki maratcake. Nei yewa eje asu qotkoineno kotino pake. <sup>3</sup> Eje denesere koto geokange, pakiso nei maneno nei yewa maine mi ma walukkake me mulap togogoleño kine metine lukkakoi, eje mi detke. <sup>4</sup> Naso loutne nei nrep eje ma more, kie metine mulap togoleño wokom kamanƙoi, no, naso banem eje mulap togole metino ea romatkeki qoe okange, so eje mulap togole kieino ea ratokmanƙe. Nei ea wane zonomineño manerop kakapa suaine okane, nei korop yuanonge, ea wane nei maneno maine mi ma walukkake. <sup>5</sup> Naso banem goinj kaiwe nei yewa eje denesere koto so tobo zikotne bonagao yau yaup lolike ari ari, sari sari, okorake, so bokaki paki, kuroge onom ari kitoki, solaine eki so wesino kitat qetat mananƙe.

<sup>6</sup> Naso eao nei yewa eje abaranka okora pore kaki, Yesu eje sekiwo kiroine eri sariki, eje ikopka biririke sari qalakko Yesu ketki, enano wawetine qeke. <sup>7</sup> Asu qotkoine yewa, eje Yesu wano aroine suaine aroke rake, “Yesu, ge Anutu Suaine Wetika Weti, enane gipole! Ge na dalino okan nanikene? Na Anutu wane kaitko menen ganmaile. Goño na matalinane more wikile zok misuk ninikene!” <sup>8</sup> Eje yale waka rake, ea

yemo Yesuŋo asu qotkoine yewa olale rake, “Asu qotkoine, ge ŋei yewa qeliŋka arinom!”

<sup>9</sup> Pakiso, Yesuŋo qesonkake, “Ge, ejetŋone ma?”

Asu qotkoine eje rake, “Nene ejetze, kawali ŋei, nene magu suaine, ea wane asu qotkoine nene louloutneŋo ŋei iwa wane kotino met-maine.” <sup>10</sup> Pakiso, eje koso Yesu sorinka rake, “Kepe iwa ŋine misuk osopŋonnom arikene.”

<sup>11</sup> Berek magu suaine eje meŋo erinat ea ŋara ne gekoi. <sup>12</sup> Ea wane asu qotkoine eje Yesu togogleka sorinka rakoi, “Nene nebu biraŋonnom ari berek eŋane kotoeno maine wakesikene!”

<sup>13</sup> Yesu eje dere more, asu qotkoine edane rake, “Maine ŋine yewa arikei.” Rakiso, Asu qotkoine eje ŋei yewa qeliŋka more, saket ari berek eŋane kotoeno waketkoi, waketpi, berek magu suaine yewa eje biririke ari korop sorao sontake ket dokuo gok ne more seukwarekoi. Berek magu suaine kibiene2,000.

<sup>14</sup> Berek ware ware eje masi ea kau paki, kaetongi, korop ket ari more matko matko so kepe saiwo ŋei nrep donkisi edangoi. Pakiso ŋei nrep louloutne eje ari berek seukkoi ea ongoi.

<sup>15</sup> Eje koso Yesu wano ari more, ŋei yewa kau eje sogino asu qotkoinenjo matalikaki geke, ea eje maine lap lap ramu more wetine lotkeki tik naneŋ metke. Naso yewao ŋei nrep eje ka more kaet onge. <sup>16</sup> Ea wane berek ware ware edo qelan ŋei asu qotkoinerop eŋane so berek seu seuenane kine ra qelane ŋei nrep magu yewa edangoi.

<sup>17</sup> Ea wane ŋei nrep eje dere more, koropŋo Yesu wane don togole iwa rakoi, Yesu eje ikopka

nenane kepe mat iwa qeligeso kepe mat maneo ariake.

<sup>18</sup> Yesu eje seki koto waketkiso, nei yewa sogino asu qotkoinerop geke, eje Yesuerop arikeik wane sorinkake.

<sup>19</sup> No, Yesu eje nei yewa ma kitatka rake, “Ge zinge matnono ari more nabok magak so wenem sotawekopnone, kine kine solanono Waomno ma-ma-ke so Anutu wane wet borik suaine gejane solanono wakonmaike, ea wane donkisi edannom.”

<sup>20</sup> Yale olatkiso, nei yewa eje zinge ari more mat suaine mete etke, 10, yaline yewao korop lolike ge more solaine Yesuno maulukkake, ea wane ra qelanane edane arike. Nei njerep eje dere more onjane qaeke. Kepe iwa enjetine, Mat Suaine Mete Etke.

### *Yesu Eje Yairus Borasine So Zoma Njerep Mane Ma Menajotke*

<sup>21</sup> Pakiso, Yesu enjine so dokoine, eje koso doku namun ratoke erinat ariuso nei njerep magu suaine eje mo sari qalakko lewage metkoi.

<sup>22</sup> Yairus eje mat yewa wane Yuda wane lewa lewan urum wane njene, onjo sari more Yesu wane osino kino pese ket wawetine qe more

<sup>23</sup> Yesu qesonka more zok arokke. “Borasone nigatne mo bomitne seukeakane okanmaike. Ge sari more metenone kutno motnom, zoma yewa qelinjaki eje maine koso menageake.”

<sup>24</sup> Pakiso, Yesu eje nei yewa enjerep ariukso nei njerep louloutne eje watke lolikka arikoi.

<sup>25</sup> Pakiso, njerep mane eje njerep zoma wenenj.

<sup>26</sup> Zoma yewa naso banjem metokangi, komaine 12 okangiso eje wesiine zoma yewa wane ra

more mauluk mauluk eᅇano biraki midakakae, ᅇo, eᅇe maine mi ma menaᅇ kakoi. Eᅇe wikile zok takotke manbi, zoma eaᅇo sari suakake. <sup>27</sup> Pakiso, ᅇerep yewa eᅇe Yesu wane siron dere more sari ᅇei ᅇerep magu suaine yewa eᅇane keueno Yesu maratka osino sari more iwa yale detke. <sup>28</sup> “Na meteneᅇo eᅇano uakaikale me takotino maineka mosikale, pakiso nae koso menaᅇgale.”

<sup>29</sup> Eso ᅇerep yewa eᅇe metine Yesu wane laplapko uaka more yewaka detki mo maine menaᅇkake. Pakiso, ᅇerep zoma yewa mo midakakae. <sup>30</sup> Yesu eᅇe naso bomitne yem-daka detki zonomine natne ketki, ikop zinge eᅇe qesononge. “Maᅇo metine naᅇane takotko uakeke?”

<sup>31</sup> Raki dokoine edo done mainge rakoi. “ᅇei louloutne edo wonge maguk ganbi, ge onoka wane don yaline qesonᅇonmaine? ᅇene mi det-maine maᅇo ᅇei loutneᅇo meteene laplap ᅇono ua ganmami.”

<sup>32</sup> Yale rau, Yesu eᅇe pore lolike onge, ea maᅇo laplapino make ea maratkayakane okange. <sup>33</sup> Pakiso, ᅇerep yewa eᅇe Yesu takotino uakaki zomaine midakakae, yewa wane dere zok zonomine oreki kaetkake. Paki, eᅇe Yesu wane osino sari pese wawetine qe ket more okange, yewa wane kine olatke. <sup>34</sup> Pakiso, Yesuᅇo eᅇe olatke, “Borasone, malip malipᅇoneᅇo zomaᅇone yewa ma ewek ganmaiᅇe. Ea wane ge maine ari more wet maepko gekene. Zomaᅇone mo korop midawaremaiᅇe.”

<sup>35</sup> Yesu enje n̄rep don olale okoraki, naso yewaka n̄ei natne enje Yairus wane matko n̄ine mat qelige sari olale rakoi, “Ge! Borasonone nigatne mo seukmaike. Yesu mi iwenka sarikene yeine. Eje maine mi ma wirik kayake.”

<sup>36</sup> N̄o, Yesu enje en̄ane don wane ket mi more so, enje Yairus olatke, “Ge misuk kaet gangep! Ge mali malip̄none togolekep!” <sup>37</sup> Yesu enje yale ra more n̄ei n̄rep mawaluk one more Petoro so Yakop, so en̄ane n̄ole Yohane, karewe edoka en̄erop Yairus wane matko wenen̄ arikoi. <sup>38</sup> Eje mat yewao sari more Yesun̄o ongi, ukat suaine ma more zok manerop arokkoi. <sup>39</sup> Eje ari waket more magu edange. “N̄ine mi arokeu so ukat suaine zok mi mau. N̄rep n̄rep iwa enje mi seukike. Eje yaup kulu pamaike.”

<sup>40</sup> Yale ra edangi, enje wawaine don olale more bokaka Yesu kuron̄ kakoi. Pakiso, Yesu enje mat yewao n̄ino osopone moreso enje medep nagamagain̄e, en̄ine so dokoine karewe en̄neneka ari more medep mat an̄aine pake, yewao ari waket kakoi. <sup>41</sup> Pakiso, Yesu enje n̄rep n̄rep seuseune ea wane metino ma more Yuda dongoka olatke, “Talita koumi”. Don yewa iwa yale, “N̄rep nigatne na golatmaile. Ge wienom!”

<sup>42</sup> N̄rep n̄rep yewa enje ikopka wisikae wie arike. N̄rep n̄rep komaine 12. Ea wane n̄ei n̄rep enje masi ea ka more zok on̄aene qaeke. <sup>43</sup> Pakiso, Yesun̄o nagamagain̄e yewa togole etange, “N̄ire medep n̄ara manbit nekep. N̄o, n̄ire kine kine iwa wane don kisi yauyaup misuk raut suayake.”

## 6

### *Nasaret Nei Nerep Edo Yesu Nadek Kakoi.*

<sup>1</sup> Yesu enjine so dokoine enjine mat yewa qelige more enjine matine Nasaret arikoi. <sup>2</sup> Pakiso qezarek naso okangiso enjine ari nei njerep Yuda enjane miti lewa lewanj urum kotino metkoi, yewa kito ebonge. Paki, magu suaine metkoi, enjine detka more dereretinane onjane qaeki rakoi. “Ei! Nei yewa enjine don yewa diao njine meke? Dereret yewa manjo manike? Enjine masi togole iwa dalino mamaike?” <sup>3</sup> Nei yewa enjine matmama. Enjine Maria wane gipole. Enjane njolekouna Yakop, Yosep, Yuda so Simon so qakouna iwa njenerop wenenj gemami.” Enjine yale ra more njadek kakoi.

<sup>4</sup> Ea wane Yesunjo iwa yale edange. “Anutu wane qelit nei propet enjine mat banjem miti urata ma ge arimami, edo enjane enjetene zok mawaon okanmami. No, matkopene so wenjem sotak so matene kotino edo enjane enjetine maket biraon okanmami.”

<sup>5</sup> Eso yalinane Yesu matkouna nei njerep enjane mali malipene mi pake. Ea wane Yesu enjine pore ka more masi togogole enjane zok mi make. Enjine zoma nei njerep weku weku metine more ma menanjonge. <sup>6</sup> Pakiso, Yesu enjine Nasaret mat qelige ari, mat natne yewao lolike ge more, Anutu wane binjek don nei njerep edange. No nei njerep ea enjine wetno mi malipkakoi, enjane yemo dere mezet okange.

### *Yesu Enjine Dokoine 12 Uratao Biraonge*

<sup>7</sup> Naso yewao Yesu enjine dokoine 12 ea naso yewao qeduguone more etkeka etkeka, matko

matko biraonge. So eŋe biŋek don ra qelananikei wane so ŋei ŋerep eŋano asu qotkoine esopongei wane zonom takotonge. <sup>8</sup> Pakimo edange, “Ŋine qesiŋine maine qesiŋ nagu kei wane makei, eso kine kine natne weneŋ mi ma arikei, ŋara so kite gerep me wesi kite mane misuk ma arikei, ea yeine, <sup>9</sup> ŋine kie kulit so takot suaine weku bira arikei, takot etke eamo yeine.” <sup>10</sup> Eŋe koso edange, “Ŋo, ŋine mat maneo ari lotke more ŋei ŋerep qeson onbi edo raikēi, maine iwa saket mere pa wie okanbi, mat yewa wane kotinoka mere pa wie okanikei. <sup>11</sup> Ŋo mat mane edo ŋinane don mi dere more, ŋinerop mi mesikei wane rauso, ŋine mat yewa qelige more, kie ŋino kepe nalek yewa sauke lakokeu ket metki, so eŋe masi ea ka more desikei, Anutuŋo ŋenerop ŋaba okanmaike.”

<sup>12</sup> Pakiso, dokoine eŋe matko matko ari more, mat louloutne eao biŋek don iwa yale edangoi, “Ŋine masi tanik kine kine qotkoine ea korop qelige ŋadekka more wet mainge wareu!”

<sup>13</sup> Pakiso, eŋe asu qotkoine louloutne zok ŋei ŋerep eŋano ŋine osop one moreso ŋei ŋerep zomaenerop ea kelok tau more, korop ebu ma menaŋ ongoi.

### *Yohane Doku Tau Tau Eŋe Seukke.*

<sup>14</sup> Naso yewao kepe wareware Herot eŋe Yesu wane donkisiŋo detki mo zok mat korop rokop-keke. Ŋei ŋerep natne eŋe rakoi, “Yohane doku tautauŋo mo deŋesereo ŋine wisikae wieke. Ea wane eŋe masi tanik zonominerop togogle iwa mamaike.”

<sup>15</sup> No ñei natne eñe rakoi, “Eñe Elaiya!” Natne eñe rakoi, “Eñe Anutu wane qelit ñei propet mane, eñe mo propet sogine gekoi, eñe yaleka.”

<sup>16</sup> Kepe ware ware Herot eñe ea dere more rake, “Yohane doku tautau ea mo noño sogino ebine kitatkole. Eñe koso yewa mo wisikae wie gemaike.”

<sup>17-18</sup> Mo sogino Yohane doku tau tau eñe wisika ge more don togole Herot wano rake, “Ge ñonñone Pilip wane ñanomine ea kobu makone. Masi yewa mi kopkemaiké.” Sogine Herot eñe zok Herodias ñolane ñanomine kobu make. Ea wane, Herot eñe ñei biraongi ari malipka mulap togoleño lukka masari more, mulap urungo warage ari birakakoi.

<sup>19</sup> No Herodias eñe Yohane wane dere worik okanka more qeki seukeakane okange, ño Herot eñe Yohane maine warekake. <sup>20</sup> Herot eñe Yohane ñei koboine, Anutuño birakake, dere qeka okane more kaetkaki mauluke warekake. Herot eñe naso natneo Yohane wane añaño ñine don natne dere more naso banem qisemañke.

<sup>21</sup> Paki, Herodias eñe Yohane qeki seukeakane numaine iwa yale maratkake. Herot eñe ñara suaine maki zeki eñine wakon wakon nasoino more edoraki ñei loutne sarikoi. Pakiso, eñe gavaman kepe ware ware suaine so kawali ñei eñane ware ware suaine so Galili kotino mat suaine mere arimaiké, ea wane ñei suaine suaine qeson onge. <sup>22</sup> Herodias borasine eñe sari eñet kito oreke. Ea wane Herot so ñei ñara nekoi, eñe korop eñane simin onge. Ea wane Herot eñe ñerep natawen yewa qesonka rake: “Ge kine kine yewa me yewa wane ra more qeson nannom, na

maine ginikale.” <sup>23</sup> Eje atak loutne ra togoleke, “Na ra togolemaile. Kine kine yewa me yewa maine ginikale. So nanane kepe abonj suaine ea ginikalane! Ranom na maine keuoka mapoke more ginikale.”

<sup>24</sup> Pakiso, njerep natewen yewa eje ari nagaine iwa yale qesonkake, “Na Herot onoka wane qesonka rawe niniake?”

Rakiso, Herodiasno olatke, “Ge ari Yohane doku tau tau ebine kitasiakane qesonkaikene!”

<sup>25</sup> Yale olatkiso, njerep yewa eje ikopka biririke Herot wano ari qesonka rake, “Nanane similene iwa yale. Ge ukudeka Yohane doku tautau wane ebine kitare more peletko more nanano ma sari ninnom!”

<sup>26</sup> Herot eje yewa dere more zok detki qomine umare lukke, no mo nei suaine enane deeno atak loutne takorakot ra togole okange, ea wane eje dalino koso dereretine maingeki rap. <sup>27</sup> Ea wane ikopka kawali nei mane birakaki ari mulap urum koto Yohane wane ebine kitare more, lewetine ea make. <sup>28</sup> Pakiso, eje Yohane wane lewine ea pelet maneo more, so masari njerep natewen yewa mangi, so eje ma ari nagaine mange. <sup>29</sup> Pakiso, Yohane wane ndino dokoine gekoi, eje dere more sari Yohane parenjine ea ma ari denesereo dukkakoi.

### *Yesu Eje Nei Njerep 5, 000 Njara Gumeonge.*

<sup>30</sup> Ea wane Yesu eje dokoine mo etkeka etkeka, matko matko ari warekoi. Eje zinge sari koso Yesu wano lewage more, don kisi urata kine kine makoi, so binjek don magu edangoi, ea

olatwarekoi. <sup>31</sup> Pakiso, nei n̄erep louloutne Yesu wano ari sari okanbi, ea wane ēje n̄ara mire nene wane numaine mi wakonge. Ea wane Yesūjo dokoine edane rake, “Wieu, kepe n̄eiine midaino, ari more n̄enzeka nigatne mere zonom mājem.”

<sup>32</sup> Rakiso, ēje kieke seki mane nigatne ma more wie kepe mane nei midaino en̄neneka arikoi.

<sup>33</sup> N̄o nei n̄erep korop ēje mo onbi ariuso, ēje ikopka detone more n̄adeeno mogatone taganka biririke qalakko yewa Yesu ējine so dokoine arikoi, yewao alakane ari lotkekoi. Matne matne nei n̄erep korop yewa sarikoi. <sup>34</sup> Yesu ēje seki qelin̄ka ket more nei n̄erep magu suaine yewa one more qom borik suaine ējane okange. Ēje ongi maine mi metlukkoi. Ēje medep nigatne nagamagaene seuseune, wanap yale metpi, Yesu ēje bījek don loutne kito ebonge. <sup>35-36</sup> Kepe zinge kere qoeakane okangiso dokoine ēje Yesu wano sari rakoi, “Ge magu iwa edane bira onnom ēje mat osop mere arimaike. Yewao ari more n̄ara maratkau, kepe iwa nei midaine so ruo mo kereakane okanmaike.”

<sup>37</sup> Pakiso, Yesūjo iwa yale edange, “N̄ido n̄ara ebonikei.”

Ēje rakoi, “Nei nau! Nene 500 wesi setne ēajo ējane n̄ara maine mi qolekene.”

<sup>38</sup> Yesu ēje koso qeson onge. “N̄ara darap n̄enzo metmaike? Ari ka more sari nolatpi!”

Raki ēje ari ka more sari olale rakoi, “Bret nigatne mete mane so zawon etke.”

<sup>39</sup> Yale rauso Yesūjo dokoine edane rake, “N̄ine nei n̄erep maguine maguine mapoke bira onbi pese ket touk kutno metpi.” <sup>40</sup> Rakiso, ēje yale

nei n̄erep mapok onbi magu mane 100, magu mane 50 yale mere arikoi. <sup>41</sup> Metpiso, Yesuño bret mete mane so zawon etke ea ma more malipka okora qeliwo potki waki mosopka more bret so zawon ea mapoke more, dokoine ebongi, damo qe nei n̄erep magu yewa ebonwarekoi. <sup>42</sup> Paki, nei n̄erep magu yewa eñe korop neu n̄atene qeki rokop onwareke. <sup>43</sup> Paki dokoine eñe n̄ara nekoi, ea wane tutule ea qedugu more rosa 12 yale rosakkoi. <sup>44</sup> Nei n̄ara yewa nekoi, eñe 5, 000 yaline.

*Yesu Eñe Doku Namuñ Kutno Gesoke Arike.*

<sup>45</sup> Ikopka, Yesuño dokoine qebin ongi eñe sekiwo wa more doku namuñ nat parom Bet-saida oken alakane arikoi. No eñine yemo yewa mere nei n̄erep magu yewa biraongi mateno ariwarekoi. <sup>46</sup> Yesu eñe nei n̄erep bira ongi korop ariwareuso, eñe bonaga mane nigatne eao wa more meñenka metke. <sup>47</sup> No, ruoo dokoine eñe seki kutno doku namuñ kebago metpi so, Yesu eñineka tagalo metke. <sup>48</sup> Yesu eñe ruo panaman koto dokoine ongi momoño qebinongi, eñe urata suaine zok pelekoi. Paki, kepe qae qae nasoo. Yesuño doku namuñ kutnoka qesokma gesokma sari osoeno lotke more, yuanoniakane okange. <sup>49</sup> Dokoine eñe Yesu doku namuñ kutno gesokma gesokma sariki ka more, kuroge aroke rakoi, “Nei seuseune eñane oñañeño sarimaike.” <sup>50</sup> Eñe enñenarek ka more kaet suaine okangoi, pakimo, Yesu eñe yewaka done raki paki, edane rake,

“Ñine togoleu iwa yemo noñom sarimaile! Ñine misuk kaet n̄uniake!” <sup>51</sup> Yale ra edane more seki

kutno wa metkiso momo donj mangi dokoine eje ea ka more, onjaene qaeki metkoi. <sup>52</sup> Eje Yesu wane zonomine mi detlukkakoi. So Yesu eje nej njerop magu suaine njara ebonge, ea wane eje deretene mi qelanange, eje dereretene zok manerop siukki qelan okangoi.

### *Yesu Eje Genesaret Kepeo Zoma Nei Loutne Ma Menanonge*

<sup>53</sup> Yesu ejine so dokoine, eje Galili doku namun yuane more, ari Genesaret lotkekoi. Galili doku namun nat paromino kere kito more seki qalakko lukkakoi. <sup>54</sup> Sekiwo njine qelige ketpi, so mat yewa wane nej njerop eje ikop mo Yesu ka more detkakoi. <sup>55</sup> Eje Yesu wane donkisi dere more ikopka ket biririke matko matko ari zoma nej njerop zuanone ebu sarikoi. No natne edom numa ari ari wane konap mi okangoiwo, ea teweo pise tewekone korop Yesu wano ebu sariwarekoi. <sup>56</sup> Yesu eje korop mat nigatne kotino me mat suaino ari lotkemanje, rokop eje zoma nej njerop ebu sari soben keuno biraone more Yesu mejenka ramanjoi, “Zoma nej njerop iwa eje maine genane takotjone ea uakakei.” Rau eje detongi, meteene takotino ua ka more menanomanje.

## 7

### *Anutu Wane Gege Eajo Sogi Gege Yuankamaike*

<sup>1</sup> Anutu wane papa togon welaine nej natne, Parisi, so Anutu papa togon welaine nej natne, Skribe, eje Yerusalem njine sari Yesu wano

lewangoi. <sup>2</sup> Eņe Yesu dokoine onbi meteene mi sauke libe qeke, eņe yaup ņara ma nekoi.

<sup>3</sup> Parisi so Yuda ņei ņerep korop eņe aso ņabo eņane masi ea mogare ge okanmaņkoi. Eņe ņara nekeiwane okane more aso ņabo ra rokop don yale rake, yalewaka eņane rokoune ma more meteene sauke more maine ne okangoi. <sup>4</sup> So nalu qole qoleo ari more zinge sari ņara nekeiwane okane more eņe doku tau more ne okangoi. Eņe kine kine natne aso ņabo eņane masi ea korop mogare okan waremaņkoi. Eņe lase, kap ņara mire ne, so kulu papa wane kine kine korop sauke mauluke gemaņkoi.

<sup>5</sup> Eņe Yesu qesonka rakoi, “Onoka wane dokonone eņe asoņabo eņane numa tego ea mi mogatmami. Eņe meteene mi sauke more ņara yaup ma nemami.”

<sup>6</sup> Rauso, eņe iwa yale edange, “Isaianjo ņine isi ņei zok ņidorake, ņinane kineņine papiao iwa yale Anutu wane dongo qeke pamaike.

‘Anutuņo rake, ņei tego yewa eņe pieneņoka naņane eņetne nora bukeu waokanmaike. ņo, wet derereteneņo yemo na qeliņnane more, amaņ okoramami. <sup>7</sup> Eņe nae yaup eņetneka nora bukeu waokanmaike. Eņe aso ņabo eņane numa tego yewa kito ebone more raokanmami, iwa Anutu wane don.’”

<sup>8</sup> Yesu eņe koso edane rake, “ņine Anutu wane don masi koboboine mo qeligeu siuk ņunmaike? Pakimo, ņine ņei ņinņine aso ņabo eņane don eaka malipka gemami.”

9 Yesu eje koso edange, “Njine zok detluke more Anutu wane don koboboine ea matali qetali okane more njinnine asonabo enane numa tego malipka gemami. 10 Mosenjo sogino qei bano mo rake, ‘Njine nabok magak ere qesiñore more geokanikei, No, ñei mane eñe nabok magak don borikine etaniakeo, eñe qeu seukeake.’ 11 No, njine, Anutu wane papa togon welaine ñei, ñei ñerep masi kine mane iwa yale edanmami. Ñei mane eñe wesiinerop nagamagaina qesiñ osi-akane okane, ño, siluñ etane raokanmaike, na mo Anutu wane biñek qile. 12 Njine yale edanbi, eñe naga magaene mi qesiñone more, qeliñ on-manñei. 13 Njine njinnine asonabo kito ebo ebon ñei ñerep ea edanmami, njine Anutu wane don zonomine mau kito okanmaike. Njine kine kine loutne yalewa ma okanmami.”

### *Kine Kine Iwaño Maki Ñei Dienerop Okanmanñei*

14 Yesu eje koso ñei ñerep magu suaine edo-raki sariu edange, “Njine koropño nanane don iwa dere more wetñineño motpi so detlukkeu. 15 Njine detmami, kine kine iwa diinerop ñadino pamaike, eaño njinane kotonjine mi maki sig-ileake. No kine kine natne njinane wet dereretñine kotino pamaike, eaño saket more maki wet dereretñine korop sigile okanmaike. 16 Ñei mane eñe wetineropño don iwa detlukkeake.

17 Yale ra more eñe ñei ñerep yewa qeliñone more enjine so dokoine eñe ari mat maneo wa more don rokop rake yewa wane kine desikei-wane qesonkakoi.” 18 Yesu eje iwa yale edange,

“Ninane dereretjinejo nej nrep natne enane dereret mi yuan onmaike. Nara kine kine korop pamaike, eajo ne more nej nrep mi sigilekene. <sup>19</sup> Nara yewa wet dereretjine mi qeduguyake. Nara qomjino ket more koso kanjinka saket ari-ake.” Iwa yale Yesu ene nara kine kine yewa ene korop Anutu wane kaitko libekaka pamaike.

<sup>20</sup> Pakiso, ene rake, “Kine kine nej wet dereret kotino pamaike, eajo saket more maki nej nrep wet dereretjine korop sigile okanmaike.

<sup>21</sup> Nej nrep wet dereretko pa more saket maki nej nrep dirop okan okanmaine yemo iwa, edo dereret qotkoine detokanmami, so nej nrep natewen qaluwit wenip yauyaup ma okanmami, so nej naka pilanjo engu mamami me kine kinejo matalionbi seuke okanmami, kobu ma okanmami, <sup>22</sup> nej mane ene nej mane wane nanomine kobu ma okanmaike, bailalan okan okanmami. Njine masi tanik kine kine natne korop okan okanmami, isi kine kine ma okanmami, wawaine masi kine kine okan okanmami, bau wawa masi kine kine ma okanmami, qe baik ma baik don ra okanmami, wawaine don kine kine ra okanmami, doku togole ne more qelan qelajine okan numa kine kine mau bori okanmaike.

<sup>23</sup> Masi tanik kine kine qotkoine korop iwanjo nej nrep wet dereretko pa more eajo saket maki nej nrep dienerop okan okanmami.”

### *Nrep Mane Enane Malip Malipine Togole*

<sup>24</sup> Yesu ene yewa qelige ea njine wie Tire matko ari lotke more, mat mane wane kotino ari waket siuke metke, onoka wane nej nrep edo esatka

enano mi sari lewangei wane. No silun dalino siuke metkirap. <sup>25</sup> Mida! Nerep mane mat yewa nje eje Yesu mo detkaki metke. Nerep yewa eje borasine asu qotkoineno matalikaki metke, ea wane nerep yewa eje ikopka sari Yesu wane osino kino ket pese wawetine qeke. <sup>26</sup> Nerep yewa eje tego maneo nje, qelan nerep, eje Yuda wane tegoonje mida. Eje Ponisia tegoo nje, kepe mat ea wane welaine, eamo Siria kepeo. Eje Yesu wano ari seleleine qe menjenka more rake, “Borasone asu qotkoineno matalikaki metmaike. Ge esopkanom!” <sup>27</sup> Yesu eje olale rake, “Nene mikepka medep nara gumeonjem. Nene medep enane nara maine mi biranem kasimde enano ariake.”

<sup>28</sup> Yale rakiso, nerep eje mainge rake, “Waom, ge don wele ramaine, no medep eje nara ne okanmami, naso yewao sisine kepo ketki kasi eje medep enane nara sisine ea ma ne okanmanjei.”

<sup>29</sup> Pakiso, Yesu eje nerep olatke, “Ge yale ramaine, ea wane maine zinge arinom borasonone asu qotkoine ea mo qelin kamaike.”

<sup>30</sup> Yale ra olatki, nerep eje zinge matko ari kaki borasine ea asu qotkoineno mo welekatne qelin ka saket ariki eje maine papaino kulu pake.

*Yesu Eje Nei Mane Anja Ketine Won Wole Ma Menankake.*

<sup>31</sup> Yesu eje wie Tire qelige more Sidon kepe so Mat Suaine Meteetke(10) kepe keuoka ratoke ari Galili doku namugo lotkeke. <sup>32</sup> Nei natne eje nei mane done mi raraine so ketine won wole ea Yesu wano iwenka sari onjo metine more ma menan

kayakane olatkoi. <sup>33</sup> Pakiso, Yesu eɛe ɛei yewa maki eretneka ɛei ɛerep magu yewa qeliɛone aman ari mere so Yesuɛo ɛei yewa wane ketino metine boineɛo qesikane more, mekatine boino sopotke belakamino motke. <sup>34</sup> More so qeliwo potki waki wetine aroke saki, rake, “Epata!” Don ea wane kine iwa yale. “Ketɛone so aɛaɛone lotkeuk!”

<sup>35</sup> Yale raki ɛei yewa dereretine lotkeki korop detkake. So belakamine umareke, ea ewekki don maine rake. <sup>36</sup> Yesu eɛe sari ɛei ɛerep magu yewa rawetone more rake, “Masi iwa mamaile, ea wane don sigi misuk rau sua ariake.” Yale ra naso baɛem rawetone okanmaɛke, ɛo, eɛe soringe takotke eɛane don sigi rau sua arimaɛke. <sup>37</sup> ɛei ɛerep korop eɛe oɛane qaeki rakoi, “Urata kine kine natne welekatne wakonmaike. ɛo, Yesu eɛe ɛei ketine won wole ea maki lotkeki don detlukmaike. So eɛe ɛei aɛaine umatne so mawon mawole, ea maki don ramaike.”

## 8

<sup>1</sup> Naso yewao ɛei ɛerep magu suaine natne eɛe Yesu wano koso lewangoi, ɛo, ɛaraene mo korop midaonge, Yesu eɛe dokoine edoraki sariu edange, <sup>2</sup> “Na ɛei ɛerep magu suaine iwa eɛane qom borik suaine detmaile, eɛe zok kaiwe mama karewe naerop metpi ɛaraene mo midamaike. <sup>3</sup> ɛo, eɛe ɛara mi nene yaup metpi, na biraonbe arikeiwo, natne eɛe ari more numao deene lolikki ket rasukei. Natne eɛe matene amenɛine sarikoi.”

<sup>4</sup> Dokoine eɛe eɛane don mainge rakoi, “Kepe iwa ɛeiine midaine, ge detmaine ɛene ɛara diaoɛine ɛei ɛerep iwa ma ebonɛem neu roko-poniake?”

<sup>5</sup> Yale rauso, Yesu eɛe qeson one rake, “Ninano bret darap metmaike?”

Raki, eɛe maratka more rakoi, “Bret mete mane so mete natko zitne etke(7) metmaike.”

<sup>6</sup> Olatpiso, Yesu eɛe ɛei ɛerep edane rake, “Nɛine korop pese ket kepo metpi.” Raki eɛe korop pese metpiso, eɛine bret mete mane so mete natko zitne etke(7), yewa ma more, Anutu wano bakom kito mosopka more mapoke dokoine ebongi edo damo qe ɛei ɛerep magu suaine yewa korop ebonwarekoi. <sup>7</sup> No, eɛe zawon nigatne karewe metke, ea weneɛ manbiso eɛe yalewaka Anutu bakom kito more mosopka dokoine ebongi, eɛe yale waka damo qe korop magu yewa ebonwarekoi. <sup>8</sup> Eɛe neu rokop ongiso, Yesu dokoine eɛe ɛara tutule yewa rosa 7 yale rosakkoi. <sup>9</sup> Nɛi ɛerep magu yewa eɛe 4, 000ɛo metkoi. <sup>10</sup> Yesu eɛe ɛei ɛerep magu yewa biraongi, ariu, eɛine so dokoine ikopka sekiwo wa more Dalimanutia kepeo arikoi.

*Anutu Wane Papa Togon Welaine Nɛi, Parisi, Edo Masi Togogle Mayakane Yesu Qesonkakoi.*

<sup>11</sup> Ea ari lotkeuso Anutu wane papa togon welaine ɛei natne, Parisi, eɛe sari Yesu wano aɛa soraɛ don okane more Yesu qesonka rakoi, “Ge masi togole mane ma sikanɛonnom kaɛem, ge Anutu wano ɛine sarimaine.” Eɛe yale ra more dongo liwekkaikei wane okangoi. <sup>12</sup> Yesu eɛe

rake, “Oo yai! Onoka wane ñei ñerep eñe naso iwao nonjo masi togogole mane mawe kaikeiwane sari ramami? Midakaka! Naso iwa nonjo masi togogole mane koso ñei ñerep ñinano mi ma sikan ñunikale.”

<sup>13</sup> Yesu eñe yale edane more eñine so dokoine eñe mat yewa qelige sekiwo wa more doku namuñ kitare eri nat parom arikoi.

*Yesu Eñe Rake, “Ñine Parisi So Herot Erane Masi Kaulukkei.”*

<sup>14</sup> Yesu dokoine eñe bret natne weneñ mi makoi. Eñe nigetongi yaup sekiwo wa arikoi. Bret weku seki kotino pake. <sup>15</sup> Yesu eñe ea wane girem don togole edane rake, “Ñine Anutu wane papa togon welaine ñei, Parisi eñane tego so Herot eñane masi kauluk onikei. Eñe bret maki sua okanmaike. Eñane masi eaño yalewa ñei korop rokoponmaike.”

<sup>16</sup> Dokoine eñe don yale dere more, eñe enñene auye rakoi, “Bret eri nigetñongi qelige sarine, eñe ea wane mane ramaike.”

<sup>17</sup> Rau, Yesu eñe don yewa dere more edange, “Ñine onoka wane ñinñine aumami, ñene bret mida? Oo, ñine wet dereretñine midaine? Oo ñine dereretñine mo wongike. <sup>18</sup> Ñine denjine weneñ, ñine onoka wane kine kine mi kamami me? Ñine ketñinerop onoka wane don yewa wane kine mi detkamami me? Ñine mo nigetñunikei me?

<sup>19</sup> Naso na bret mete mane mapoke, 5 tausen(5, 000) ñei ñerep eñano ñibonbe damo qekoi, naso yewao ñado neu, wokitne metki ñine rosa darap rosakkoï?”

Eñe rakoi, “Rosa 12!”

<sup>20</sup> Eje yale raumo, Yesu eje koso qesononge, “No njine na bret 7 mapoke, jei njerep 4, 000 enjano njibonbe, damo qe ebongoi, naso yewao eje neu, wokitne metki njine rosa darap rosakkoi?”

Eje rakoi, “Rosa sewen.”

<sup>21</sup> Rau, Yesu eje yewaka edange, “Njine zok ea mi detlukkamami me?”

*Yesu Eje Betsaida Matko Nei Mane De Pilik Ma Menankake.*

<sup>22</sup> Pakiso, eje ari Betsaida lotkeu, jei mane deine pilik pilikine, eje Yesu wano ma sarikoi, jei ea eje Yesuño metine lewetino mosiakane.

<sup>23</sup> Pakiso, Yesu eje jei de pilik yewa metino maki, ere mat njadino qeinat ket more, Yesuño jei yewa deino mekatine sopotke more, so metineño deino qesikane rake, “Ge maine pore kine kine kamaine me?”

<sup>24</sup> Rakiso, jei yewa eje pore lolike more rake, “Na jei natne pore onmaile. Na onbe eki yale arimami.”

<sup>25</sup> Yesu eje metineño koso jei yewa wano motki, jei yewa eje deine togoleka pore kaki, deine mo maine wakongi, pore kine kine korop ka qelanange. <sup>26</sup> Pakiso, Yesu eje jei yewa olale biraka rake, “Ge kere more eri mat suaino misuk wakesikene. Ge koboboine ari matjono lotkekene.”

*Petoro Eje Yesu Wane Ra Qelanane Rake, Eje Kristo*

<sup>27</sup> Yesu ejine so dokoine eje yewa njine wie arimage mat natne Sisaria Pilipai osino lotkekoi, numa keuno dokoine qesononge, “Nei njerep eje na wamo ma noramami?”

<sup>28</sup> Edo iwa yale olatkoi, “Natne edo ge Yohane doku tau tau goramami. N̄o, natne edo ge Elaiya goramami. N̄o, natne edo ramami, ge Anutu wane qelit n̄ei propet mane sogine gekoi, en̄ano n̄ine.”

<sup>29</sup> Yale rauso, koso en̄ene qesonone rake, “N̄o, n̄idom yemo nan̄ane dalino ramami?”

Rakiso Petoroŋo donine turun̄ine mainge olale rake, “Ge Mesia, Anutuŋo biragange.”

<sup>30</sup> Yale rakiso, en̄e togoleka ra wetone rake, “N̄ine nan̄ane kine yewa n̄ei mane misuk olasikei.”

### *Yesu En̄e Seuke More Koso Wisikae Wieakane Rake*

<sup>31</sup> Yesu en̄e kieke more, en̄ine solaino wikile wakoniake ea wane dokoine kito edane more rake, “N̄ei Wawainane Gipole na wikile zok manerop peikkale. N̄ei n̄etne korop so Anutu wane mosop n̄ei suaine so Anutu wane papa togon welaine n̄ei, Skribe, en̄e korop n̄adeknane more, nekuwi seukkale, kaiwe mama karewe yale pa more, koso wisikae wiekale.” <sup>32</sup> Yesu en̄e yale ra qelan̄ane edangi, Petoro en̄e Yesu maki ere qeinat ket mere more Yesu rawetka rake, “N̄ei en̄e ge mi gekukei.” <sup>33</sup> N̄o, Yesu en̄e zinge pore dokoine one more Petoro rawetka rake, “N̄ei borikine, ge na n̄adeno arinom! Goŋo weti Anutu wane wet dereret mi detmaine! Midaka! Ge kepe n̄ei wet so dereret eaka dere gemaine!”

<sup>34</sup> Yesu en̄e en̄ine dokoine so n̄ei n̄erep magu korop edoraki en̄ane osino sariu, iwa yale edange, “N̄inano n̄ine n̄ei manen̄o na mogat naniakane raso, en̄ine simileine ea korop maki ketwarekiso

wikile desiakane eweke ariki ene na nekukei, yalewaka ene qekei. <sup>35</sup> Nei mane ene wikilane kaetkaki solaine mawalukayakeo, ene gege wane numaine korop siuklukkayake. No, nei mane ene binjek don wane so nae wane wetkeake, paki gegeine korop qikka more, ea waneka ra more seukeake, nei yewa ene gege marat kayake. <sup>36</sup> No, nei mane ene kepe wane abonj kine kine korop magekeo, ene seuke more onoka marat kayake? Midakaka! <sup>37</sup> Seuke more koso onokakanjo gege wane lewine qelinqi sari maniake? <sup>38</sup> Ukude naso iwao kepe iwa wane nei njerep korop masi gotkoine kine kinejo mau watke rokpkemaik. So ene wawaine masi kine kine ea korop Anutu wane deo okanwaremami. Nei mane ene naso iwao nei njerep magu yewa enane keueno njine ene nae so nanane binjek don rayakane gamu gamu okane geakeo, na Nei Wawainane Gipolejo ramaile, na njado Anutujo enine tungo biranangi, anjelo magu enjerep qeli qelinqa sarikene, naso yewao na nei yewa don koboine maine mi lasikale.”

## 9

<sup>1</sup> Yesu ene koso don takotke iwa yale edange, “Na welekatne njidanmaile, nei natne njine iwa okoramami, mi seuke more wisika gekei, naso eao Anutujo njine korop warenunmaik, eao Anutujo qeli ewe zonominerop wakongi kaikei.”

*Yesu Sola Tanikine Kine Mane Okange*

<sup>2</sup> Kaiwe mama 6 goikiso, Yesu eņe Petoro, Yakop so Yohane ebuki enņeneka bonaga mane kiro-roine wetika weti yewao wakoi. Wa enņeneka okorauso, eņane deeno eaka Yesu wane kait sola tanikine qeinge more kine mane okange. <sup>3</sup> Laplap kine kine korop libe libe qe qelaņane teine okange. Kepe ņei maneņo okangi, eņane laplap yale libe libe qelaņane teine mi okaniake, so sauki yalewa maine mi wakoniake. <sup>4</sup> Dokoine eņe pore otpli ņabotkine Elia so Mose ere wakone more Yesurop don auye okorakoi. <sup>5</sup> Petoro eņe ea ka more ikopka Yesu olale rake, “Kito ņebon ņebon! Nene iwa metņem wekumane zok okanmaike. Nene maine seli kise karewe(3) maikene! Mane geņane, mane Mose wane, mane Elia wane!” <sup>6</sup> Petoro eņine so kimatkine eņe kaet zok okangoi. Ea wane Petoro eņe masi tanik yewa wane kine mi detluka more don qazaņ rake.

<sup>7</sup> Paki, eaka wakongi paki, kezoņņo ņei karewe korop kawetongi so Anutu aņaineņo kezoņ koto ņine iwa yale rake, “Yewa naņane wemedep wekuku! Na wetneņo malipkamaile. Nine korop eņane don desikei!” <sup>8</sup> Don yale wakongi dere more so dokoine eņe ikopka deene pore lolike ņei mane mi kakoi. Yesu eņineka eņerop okoraki, kakoi.

<sup>9</sup> Eņe bonaga qeliņka ket more, Yesu eņe dokoine togogole rawetone rake, “Kine kine iwa wakongi kamami, ea wane ņei ņerep siron misuk ra qelaņan onikei. Baņ, na Nēi Wawainane Gipoleņo, deņesereo ņine wiewale, naso yewao maine ra qelaņan onikei.”

<sup>10</sup> Eje don ea dere teweke more enjene auye rakoi, “Don yewa denjesereo njine wie wie ea kine dalino wane ramaike.” <sup>11</sup> Ra more eje koso Yesu qesonka rakoi, “Dalino wane Anutu papa togon welaine jei, Skribe, eje ra okanmami, qelit jei, Elaiya eje alakane sari more, numa kine kine makoboeake?”

<sup>12</sup> Yesu eje dokoine karewe ejane don mainge rake, “Na njidanmaile. Elia eje mo sariki, jei eje enjene simileene mogare more masi tanik kine kine zok okankakoi. Yale Anutu wane papa togon donjo mo rake. <sup>13</sup> Skribe ejane don ea i welekatne. Elaiyajo mikep sari more, ejine kine kine mo mauluk wareke. No, donba iwa yale onoka wane mo sogino Anutu wane papa togon dongo gekoi pamaike? Eje ramaike Jei Wawainane Gipole eje wikile zok mayake, so jei edo manerop ma baikkaikei.”

*Yesu Eje Medep Mane Asu Qotkoinerop Ma Menankake.*

<sup>14</sup> Eje ea njine ket sari dokoine natne metkoi, eje onbi jei njerep magu suaine edo ejano lewage lolikone mere more Anutu papa togon welaine jei, Skribe, eje dokoine ejerop don auye kitat okangoi. <sup>15</sup> Paki, jei njerep magu yewa eje kau, Yesu sariki eje korop qomene qise poradangi biririke Yesu osino ari more kaiwe maine mangoi. <sup>16</sup> Yale rau, Yesu eje dokoine qesonone rake, “Njine onoka wane don auye kitat okanmami?”

<sup>17</sup> Yale qesonongi, jei njerep magu yewa ejane keueno njine manerjo wie rake, “Kito ebon ebon na medepne mane asu qotkoinerjo kotino mere

aṅaine ma won geki, ea wane na geṅano ma sarimaile. <sup>18</sup> Naso baṅem asu qotkoine yewaṅo medep iwa togoleka ma main qein ma birakaki kepo ket rasu paki, mekalekatine libeka aṅainoka saket qakki ṅetine paṅ kilipke more solaine korop togo togon qe okanmaike. Na, ea wane dokoṅone edanbe edo asu qotkoine yewa osop kaikei wane ṅaṅaemami.”

<sup>19</sup> Yesu eṅe don yewa dere more, ṅei ṅerep edane rake, “ṅei ṅerep magu iwa ṅine korop mali malip ṅine mida! Na naso darap ṅinerop gekale? Na naso baṅem yalewa ṅinerop ge more, umat kine kine ṅine qesiṅṅune okangale me? Ayop ṅine medep yewa naṅano ma sariu!”

<sup>20</sup> Eṅe medep yewa eṅano ma ariu asu qotkoine eṅe Yesu ka more medep yewa main qein ma birakaki kepo ket kito todi todiṅ ariki mekalekatine libeka aṅainoka saket qakke. <sup>21</sup> Yesu eṅe medep magaine qesonka rake, “Naso darap eṅe iwa yale okankaki geke?”

Magaine eṅe rake, “Mo medepinoka yale okankaki nasu kiroine gesake. <sup>22</sup> Naso louloutne asu qotkoine eaṅo qeakane ma birakaki ari gerep kutno wa okanmaṅke. Naso natno ma birakaki ari doku koto ket okanmaṅke. Ge ṅaṅaekamaine? Ge ṅenane wet borik okane more ṅene qesiṅ ṅonikene.”

<sup>23</sup> Yesu eṅe olatke, “Ge onoka wane qesonane ramaine, ge ṅaṅaemaine? ṅei mane eṅe mali malip togole malipkayakeo, eṅano kine kine korop maine mawe wakonwarekei.”

24 Medep magaine ikopka boka rake, “Na ge malip ganmaile. No na mali malipne togole mida. Ge silunj maine mapitnanikene!”

25 Yesu enje ongi, nei n̄rep magu suaine enje sari lewan̄goi. Ea wane enje asu qotkoine ea togoleka boka olatke, “Asu qotkoine ket rasu an̄an̄one ma won genom, na ge golatmaile, ge medep yewa qelin̄kanom! Ge ari more koso mi zinge sari en̄ano wakesikene.”

26 Yale ra olatki asu qotkoine ea enje togoleka boka aroke medep yewa togoleka rapapkaki, kepeo ket pakiso saket arike. Medep enje seuseune yale pake, nei n̄rep korop enje rakoi, “Mo seukmaike.” 27 Enje yale rau, Yesu enje medep yewa metino ma more buke qesin̄kaki enje wie maine okorake.

28 Yesu enje yale okane more matko waki, dokoine enje en̄neneka san qesonka rakoi, “Nene dalino wane asu qotkoine ea esop kaikenane n̄an̄aine?”

29 Pakiso, Yesu enje edange, “Kine kine natnejo asu qotkoine ea maine mi esopkayake. Meñe meñen wekuño maine esopkayake.”

### *Yesu Enje Seuke More Wieakane Atak Mane Koso Edange.*

30 Yesu en̄ine so dokoine mat yewa qelige more Galili kepe keuoka rapoke arikoi. Nei n̄rep edo mi det kaikei wane enje sanko ket arikoi. 31 Enje en̄neneka ari mere more dokoine kito eboniake, ea wane. Pakiso, dokoine en̄neneka don iwa yale edange, “Nei edo Nei Wawainane Gipole, nei n̄aba en̄ane meteeno birakakei. Edo qeu seukeake. Enje

seuke more kaiwe mama karewe yale pa more ban koso wisikae wiewake.”

<sup>32</sup> Yesu eje don yale ra edangi, eje don yewa wane kine detpi mi qelajanongi eje koso qesonka detlukkeiwane, kaetonge.

*Yesu Dokoine Edo Don Auye Kitat Okan Nagu Rakoi, “Maño Nei Suaine.”*

<sup>33</sup> Eje ari Kaperneam mat suaino lotke more mat maneo wa mere Yesuño dokoine qesonone rake, “Ñine numao sari more onokaka don auye kitat nagu okaniami?”

<sup>34</sup> Yale ra qesonongi, eje donene midaki metkoi. Onoka wane eje numao iwa yale ra auye sarikoi. Tego iwa ñenano ñine maño ñetneze okanmaike. <sup>35</sup> Yesu eje ket pese mere more dokoine 12 ea edoraki sari osino metpi edane rake, “Ñei mane eje ñetne okaniakane okane more, eje qei ñado kito more ñei korop enane qelit qeqe okaniake.” <sup>36</sup> Yale ra more, medep mane nigatne ea ma sari qeki keueno okoraki, masatka okora edane rake, <sup>37</sup> “Ñei mane eje nanane tungo medep nigatne iwa yale mapitkayakeo, eje na mapitnanmaike okanmaike. Ñei mane eje na mapitnaniakeo, eje magak biranangi ketkole, eje wenen mapitkamaike okanmaike.”

*Nei Mane Eje Mi Naba Njoniakeo Eje Njanane Kimaze Okanmaike*

<sup>38</sup> Pakiso, Yohanenjo olale rake, “Kito ñebo ñebon! Nene kanem ñei manenjo genane enetko ra asu qotkoine esopkamaike. Pakimo, eje njanane

ɲadezo mi mogatɲone sarikimo ɲene ra wetka-maine.”

<sup>39</sup> Yesuɲo Yohane olatke, “ɲine mi rawetkau! ɲei mane eɲe naɲane eɲetko masi mane togogle mayakeo, eɲe don borikine naɲane ikopka maine ɲei ɲerep mi edaniake. <sup>40</sup> ɲei mane eɲe ɲene mi ɲabaɲonmaike, ea eɲe ɲenane kimaze okanmaike. <sup>41</sup> Naso ɲine doku wane seukeu, ɲei mane eɲe ɲine ɲune more detɲuniake, Yesu wane dokoine, yale dere more doku ore ɲibongi nekeiwo, na welegatne ɲidanmaile. ɲei yewa eɲe lewine manikale.

*Kine Kine Qotkoine Iwaɲo ɲei ɲerep Eɲane Malip Malipene Mataliokanmaike*

<sup>42</sup> “Medep nigatne iwa eɲe mali malipine naɲano pamaike. Ea ɲei maneno mataliakeo, Anutuɲo ɲei yewa wikile suaine maniake. <sup>43</sup> ɲo, metenoneɲo qe isigangi, mali malipɲone matalikeneo, ge metenone nat kitare biranom ariki, metenone natka qeliwo wa gege maratkaikene. ɲo, ge metenone nat mi kitare more etkeka gekeneo, ge sola so oɲaɲa wenenɲ gerep sora qoiqoine midaine yewao kesikene. <sup>44</sup> Gerep ea wane koma komaineno ɲei ɲerep edore more mi seukkei. So gerep yewa ɲei ɲerep ezo more mi komayake. So ɲei ɲerep mi seukkei, eɲane wikile pa wayake. <sup>45</sup> ɲo ge kienoneɲo isigangi, mali malipɲone matalikeneo, ge kienone nat kitare biranom ariake, ge kienone natka qeliwo wa gege maratkaikene. ɲo, ge kienone nat mi kitare more etkeka gekeneo, ge sola so oɲaɲa wenenɲ gerep sora qoiqoine midaine yewao kesikene. <sup>46</sup> Gerep

ea wane koma komainenjo nei n̄erep edore more mi seukkei. So gerep yewa nei n̄erep ezo more mi komayake. So nei n̄erep mi seukkei en̄ane wikile pa wayake. <sup>47</sup> N̄o, den̄onenjo isigangi, mali malip̄hone matalikeneo, ge maine den̄one nat qe koko porike biranom ariake, ge den̄one natka maine Anutuño wareñoniake kepe yewa maratkaikene. N̄o, ge den̄one nat mi qe koko porike more etkeka gekeneo, ge sola so on̄aon̄a wenen̄ gerep sora qoiqoine midaine yewao kesikene. <sup>48</sup> Gerep ea wane koma komainenjo nei n̄erep edore more mi seukkei. So gerep yewa nei n̄erep ezo more mi komayake. So nei n̄erep mi seukkei, en̄ane wikile pa wayake.

<sup>49</sup> “Sogino Yuda nei n̄erep en̄e Anutu wane bakom soep korop kiwet̄no kutno mot okangoi. Yalawaka, Anutu en̄e gerep̄no nei n̄erep korop kuteno motki ezoyake.

<sup>50</sup> “Kiwet wekumane. N̄o, en̄ane zonomine midayakeo, ge maine koso mi manom zonominerop okaniake.

“Koton̄ine peamine pakep. Peam̄no gegeze maki togole pakep. Ge nei n̄erep korop en̄erop kima geokanikene.”

## 10

### *Yesu En̄e N̄ao N̄anom Qeliñ Qeliñ Wane Kito Ebonge*

<sup>1</sup> Yesu en̄e wie ea qelige more, Yuda kepe wane nat paromino ari more Yordan doku kitare arike. Nei n̄erep magu suaine en̄e koso sari en̄ano

lewageuso eje okane okanmageake yale mogare Anutu wane binjek don edange.

<sup>2</sup> Edangiso, Anutu papa togon welaine nei, Parisi, eje sari Yesu liwekkaikei wane rakoi, “Ge ranom! Nenze ra rokop donze eaŋo ramaike, nei mane eje maine ŋanomine esopkayake, me mida?”

<sup>3</sup> Yesu eje donene mainge qesonone rake, “Sogino, Mosenjo ra rokop don daleo ŋibonge.”

<sup>4</sup> Eje mainge rakoi, “Mose eje rake, nei mane eje ŋanomine esopkayakane okane more, maine kibi mane qe more kibi yewa kot nei enano more, maine ŋanomine esopkayake.”

<sup>5</sup> Yesuŋo edane rake, “Nine so ŋinane aso ŋabokopŋine ŋinŋine wawaine ŋinane Mose eje ŋinane ra rokop don yewa qeke. <sup>6</sup> Moka sogino Anutu eje kine kine ma wakonwareke, naso yewao yale mi rake. Anutu papa togon don iwa yale qeke paki, ‘Anutuŋo nei so ŋerep ma wakonore more biraotke.’ <sup>7</sup> So, ‘Nei eje ŋerep mayakane okane more eje nagamagaina qeliŋore more ŋanominerop qeturage more, weku okangeik. <sup>8</sup> Ere ŋao ŋanom okane more, solaetne qeduguwik, weku okangi gekeik.’ <sup>9</sup> Anutuŋo don yale ra more ŋaonanom maturan otke. Neiŋo maine mi mapokosikei.”

<sup>10</sup> Matko zinge ari more, dokoine eje koso ea wane qesonkakoi. <sup>11</sup> Eje iwa yale edange, “Nei mane eje ŋanomine qeliŋka more ŋerep mane mayakeo, eje ŋanomine qeliŋka more, sot marat kayake, so nei ea bailalan urata mayake. <sup>12</sup> No ŋerep eje yaleka ŋaone qeliŋka more, ari nei mane mayakeo, eje ŋaonano qeliŋka more,

sot marat kayake, so n̄rep ea ēne yaleka bailalan urata mayake.”

*Yesu Ēne Medep Nigatne Mosoponge*

<sup>13</sup> N̄ei n̄rep ēne dokoene Yesūjo metinējo kuteno more mosop oniakane ra more ējano ebu sariu, dokoine edo don okanongoi. <sup>14</sup> Yesu ēne dokoine edo masi yale okanbi one more wet gerep okane more edane rake, “N̄ine misuk ma walukonbi! Qelīn̄onbi! Medep nigatne ea nan̄ane osono maine sariu! Anutu ēne n̄ei n̄rep medep nigatne iwa yaline ēn̄ane rokopko wareoniakane siminkamaike. <sup>15</sup> Na welekatne n̄idane ramaile. Medep nigatne ēne Anutūjo wareoniakane siminonmai ke. No n̄ei natne ēne Anutūjo wareoniakane mi siminonmai keo, ēne Anutu wane ware ware kepeo mi wakesikei.” <sup>16</sup> Yale ra more medep nigatne yewa edoka ebu okora metine kuteno more mosoponge.

*N̄ei Abōn̄ine Suaine Ēn̄ane Donkisi*

<sup>17</sup> Yesu ēne wie yewa qelige ariki numao n̄ei mane ēne biririke sari Yesu wane osino pese ket kino wawetine qe more qesonka rake, “K̄ito n̄ebo n̄ebon, maepne. Na dalino okane more naso ban̄em gege togon maratka geokanikale?”

<sup>18</sup> Yale raki, Yesūjo olatke, “Ge na mayakatne onoka wane noramaine? Anutu wekūjo mayakatne so ēne wekūjo koboboine. <sup>19</sup> Ge Anutu wane papa togon don detmaine. Ge n̄ei mane mi qenom seukeake. N̄ire n̄aon̄anom mi biranagukeik so n̄ei me n̄rep mane misuk maikeik. Ge kobu mi maikene. Ge n̄ei mane mi ma baikkaikene. Ge n̄ei mane mi isikaikene. Ge

nabok magak erane bango ge more erane don dereretskoka ge okanikene.”

<sup>20</sup> Nei yewa eje rake, “Kito nebo nebon, na mo medepnoka tego yewa mane mi yuankakole. Mo korop okane gesakole gemaile iwa.”

<sup>21</sup> Yesu eje ka more enjane simile dere more olatke, “Ge kine kine weku mi okanine. Ea makoboenom, ge ari more wesi abonjone korop ea ma more nei abonene midaine eje sunonikene. Sunone more yalinane ban gege togon mat marat kaikene. Pakiso gejone sari njadeno mogatnane sarikene.” <sup>22</sup> don yale dere more, nei yewa eje kaitine bori more zok manerop zoileke, so qomine umareki, qelige arike, onoka wane, no eje abonine zok manerop umatne pamangane, eje yale okane so eje yeine qelige arike.

<sup>23</sup> Nei yewa eje ariki, Yesuno zinge pore lo-like dokoine one edane rake, “Nei yaline wesi abonene suaine, eje Anutu wane qeli ewe zonom koto wakesikei wane rau, eje zok umareake, so eje zok urata suaine ma more abonene qelinkamami.”

<sup>24</sup> Dokoine eje don yale raki dere poradageu, Yesu eje koso edane rake, “Oo dokone, nei njerep eje Anutu wane qeli ewe zonom kotino wakesikei wane rau paki, eje urata suaine maike!  
<sup>25</sup> Kamel eje samap wane anjone wakesikei wane ea urata suaine zok mi okaniake. No, baliņa nei eje Anutu wane qeli ewe zonom koto wake waket, eje urata suaine zok manerop ma more abonine qelinkamaike.”

<sup>26</sup> Dokoine eḡe eḡane don dere more oḡaene qaeki enḡeneka auye qesonḡagu rakoi, “Ge raine, Anutuḡo baliḡa ḡei mi wareoniake, yale okangi, ḡei ḡerep ketkele gemami, eḡe Anutuḡo mi wareoniake.”

<sup>27</sup> Eḡe yale rauso, Yesu eḡe deenoka pore one okora rake, “Kepeo ḡei ḡerep ḡine ḡaḡaemami. ḡo Anutu wekuḡo eḡe mi ḡaḡaemaḡke. Anutu eḡe kine kine korop mawareakane, eḡe maine mi qekayake.”

<sup>28</sup> Petoro eḡe don mane Yesu olale rake, “Detmaine! ḡene kine kine kakize mo korop qeliḡkaware more ge mogatgangone, ge ḡene detḡonmaine.”

<sup>29</sup> Yesuḡo rake, “Na don wele ḡidanmaile. ḡei mane eḡe naḡane dere more biḡek don qesiḡnane rasuakeiwane ra more matene, me tarekop, ḡon, qa, kiaro, me nabok, magak, kepe, medep, qeliḡkawareone sari na mogatnaniakeo, <sup>30</sup> Ea wane turuḡine Anutuḡo zok manerop makoke maniake. Naso iwa yaleo yemo eḡe kepe, mat, ḡon, qa, tarekop, kiaro, me nabok, magak, medep, korop maratḡayake. ḡei edo ḡei yewa wikile wakile takotke maratḡaḡkei. Baḡ naso kutno eḡe gege togon maratḡa geake. <sup>31</sup> ḡei loutne ukude tego lewine okoramami. Eḡe naso kutno mawe tego ḡadino kesikei. ḡo ḡei loutne ukude tego ḡadino okoramami, eḡe naso kutno mawe tego lewine waḡkei.”

*Yesu Eḡe Koso Atak Mane Seuke More Wieakane Rake.*

<sup>32</sup> Yesu eḡine so dokoine Yerusalem arikei wane arikoi. Yesu eḡe alakane ariki dokoine eḡe dere

mezet okangoi. So nei n̄erep magu n̄adeeno arikoi. Ene kaetonge, Yesu ene dokoine 12 yewa koso ebu qeduguone more, en̄ine ariki masi tanik kine kine solaino wakonkayake ea wane kieke edange. <sup>33</sup> Ene rake, “Detmami! Ukude n̄ene wa Yerusalem lotken̄em. Nei man̄eño Nei Wawainane Gipole ea Anutu wane mosop nei so Anutu papa togon welaine nei, Skribe, en̄ane meteeno birakaki edo seukeakane ra togole more lobo nei en̄ano birakaikei. <sup>34</sup> Edo wawaine don olale more, sopotka kin̄ qun̄ qe more, qeu seuke more den̄esereo payake, paki kaiwe mama karewe qoeki koso wisikae wiewake.”

### *Yakop So Yohane Ere Yesu Qesonkakoik*

<sup>35</sup> Zebedi wane gipoletkine Yakop so Yohane ere Yesu wane osino sari more rakoik, “Kito n̄ebon n̄ebon, n̄ere kine kine mane wane qeson ganiketane sarimaite. Ge kine kine yewa n̄erano wenen̄ maikenane n̄otmaike.”

<sup>36</sup> Raukso, en̄e qesonore rake, “Na onokaka n̄irano wenen̄ maikalane? ramamik!”

<sup>37</sup> Ere rakoik, “Ge dere, n̄ere ma wakone bira n̄otnom. Naso ge nei waom met metko mesikene, yewao n̄ere wenen̄ wazan̄one nat nat mesikete.”

<sup>38</sup> Yesu en̄e etane rake, “N̄ire ea wane kine mi detlukkeuk paki, na qeson nanmamik. Na dere umat wikile kine kine zok manerop maikale. N̄ire ea maine okanikeik me?”

<sup>39</sup> Ere rakoik, “Oo, ea n̄ere maine okan-warekete!”

Raukso, Yesu en̄e etane rake, “N̄ire nan̄ane wikile nat parom welekatne desikeik. <sup>40</sup> Ea wane maine

ņitanikale. Ņo wazane nat nat met met ea wane noņo maine mi űitanikale. Anutu oņomka met met yewa űei maņane maulukke, ea eņe űine maniake.”

<sup>41</sup> Dokoine mete etke eņe yale dere more Yakop so Yohane erane zok sotene osike. <sup>42</sup> Yesu eņe edoraki, dokoine korop sariu edange, “Ņine detmami lobo űei űerep eņane ware ware biraka okanmami, űei yewa eņe űei űerep zonomene togogoleņo magu ma pese one more eņane ware ware togogole wareonmami. <sup>43</sup> Masi yewa koso űinane keuo mane misuk wakoniake! Midakaka togogole! Ņei űinane keuo űine ware wareņine okorayakane, ra more eņe űei magu eņane qelit qeęe okaniake. <sup>44</sup> Ņei űinane keuo űine űetneņine okorayakane, ramore eņe űei magu eņane qelit qeęe okaniake. <sup>45</sup> Na, Ņei Wawainane Gipoleņo sarikole, na űei űerep korop eņane qelit qeęe okane more qesiņ űunmaile. Ņei űerep edo na mi qesiņ nanmami. Na, űei űerep qesiņone more solane qikkawe űei űerep ma menaņ oniakane sarikole.”

### *Yesu Eņe Bartimeus De Pilik Ma Menaņkake*

<sup>46</sup> Eņe ari Yeriko matko lotke more ea yuane arikoi, eņine dokoine so űei űerep magu suaine weneņ arikoi. Ņei mane deine pilik pilikine eņe numa wazaino metke. Eņetine Bartimeus. Eņe Timeus wane gipole. Eņe mere űei űerep edo kine kine natne qesiņ kaikewane boka woka metmaņke. <sup>47</sup> Eņe mere detki rakoi, Yesu Nazaret űei, eņe done mo sarimaike, pakimo, űei yewa eņe kieke togogoleka boka rake, “Oo, Yesu, ge

Dawit wane naboine, ge netne bira ganiakane Anutuŋo mo rake. Ge nanane wetŋone borikep!”

<sup>48</sup> Nei nɛrɛp magu yewa edo kuroŋka rakoi, “Ge aŋaŋone ma wonge metnom!” Rau eŋe soringe togoleka koso boka rake, “Dawit naboine ge siluŋ nanane wetŋone borikep!”

<sup>49</sup> Yale ra bokaki, Yesu eŋe dere more paŋ lalipke okora edane rake, “Orau! Wie iwa sarikep!”

Eŋe de pilik yewa ora more olale rakoi, “Wet pesek suaine dere more wie sa arinom. Yesuŋo eŋano arikenane goramaike.”

<sup>50</sup> Eŋe dere esatka kanzaŋ wie more, momo takotine kiroine yewa makoke more, Yesu wane osino arike.

<sup>51</sup> Yesuŋo olatke, “Na dalino okanganikalane ramaine?”

Nei deine pilik pilikine eŋe rake, “Kito nɛbon nɛbon na dene koso posikalane ramaile.”

<sup>52</sup> Yesuŋo olatke, “Ge maine koso arinom. Mali malipŋoneŋo maki deŋone potmaine.”

Yale raki, ikopka deine lotkeki pore ka more, Yesu nadinu mogare arike.

## 11

### *Yesu Eŋe Ware Ware Suaine Yaline Okane Yerusalem Matko Waketke*

<sup>1</sup> Eŋe ari Yerusalem mat osino lotkekoi paki, ari mat etke metkoik, Betpage so Betani ere Oliwa bonaga wane wazaino metkoik. Yewa okorau so Yesu eŋe medewetkine etke matokotke. <sup>2</sup> Matok ore more iwa yale etane rake, “Nire ari Betani mat eriwa meuno tingo pamaike. Ea wa more

pore kauk horsi nigatne mane medeune mulapko lukkau okorayake. Horsis ea nei maneno kutno wa mi metmele, ea ka more mulap siloke so ma sarikeik. <sup>3</sup> No, nei maneno qesonjore rayake, ‘njire ea onoka wane okanmamik?’ Rakiso, njire iwa yale olale raikik. Suaineno raki sari maite. Urata qoekimo koso ikop birakaki sarikake.”

<sup>4</sup> Yale ra etane biraotki ere ari yewaka pore kauk mat mane numa meuno pake yewao horsi nigatne medeune mane mulapko luo okoraki, ere ka more silokkakoik. <sup>5</sup> Nei natne ene yewa osoetno okorakoi, ene ore more rakoi, “Ei, njire dalino okangeik wane, horsi medeune ea silokkamamik?”

<sup>6</sup> Rauso ere Yesuno don etange yale edanbik ene detpi qoeki on rau, so ere ma sarikoik. <sup>7</sup> Ere horsi medeune ea Yesu wano ma sari more, eretne momo takot suaine eno kutno motpik, so Yesu ea wane kutno wa metke. <sup>8</sup> Pakiso, nei njerep korop ene momo takotene kito qoke numao horsi kine gesoke ariakane lameke arikoi. Nei njerep natne ene zarij awak so eki metine eno rutupke lamekkoi. <sup>9</sup> Yesu ene keuo kitoki nei magu natne ndo kitou magu natne ene alakane more, iwa yale boka ra pezonka bakom kito arikoi, “Nene Anutu wane oranem! Nei iwa Waomno ene tungo birakaki sarimaik! Anutuno mosopkakep! <sup>10</sup> Naboze Dawit naboine sari ware noniake! Anelo ene qeliwo Anutu wano orau!”

<sup>11</sup> Ene yale okankau, Yesu ene Yerusalem lotke more Anutu Wane Bakom Urum koto waket more

kine kine kotino pake ea korop kawareke. Kepe mo qoeakane okangi, Yesu eņe dokoine 12 yewa ebuki, Betani ari pakoi.

### *Yesu Eņe Fik Eki Soakkake*

<sup>12</sup> Kepe qaeki sakoka eņe wie more Betani mat qelinġa sari numa keuo Yesu eņe ęara wane seukke. <sup>13</sup> Seuke more deine potki ariki kaki fik mane metine loutneņo supakaki qei aman okorake Yesu eņe wele natne mayakane okane ari fik eki kino okora pore kaki wele mane mi metke. Midaka togole. Onoka wane, wele qeęe nasoino mida wane, eņe pore metineka kake. <sup>14</sup> Paki, Yesu eņe fik yewa olatke, “Ge koso ęado wele mane mi qekene! Midakaka togogole!” Dokoine eņe ea detkakoi.

### *Yesu Eņe Anutu Wane Bakom Urumgo ęei ęerep Qole Qole Metkoi Ea Osoponge*

<sup>15</sup> Eņe ari Yerusalem lotke more, Yesu eņe ari Anutu Wane Bakom Urum kotino waket more ęei ęerep nalu qole qole urata ea wane kotino ma metkoi, ea kieke more osoponge. ęei eņe zake yewa kutno mere wesi setne maingekoi, so met kutno mere naņi qole qole urata ma metkoi, ea korop kito surubage qaġki ketke. <sup>16</sup> Paki, eņe kine kine koso Anutu Wane Bakom Urum wane sen koto mi ma waket saket okangei wane ra togoleke. <sup>17</sup> Ra togole more iwa yale edange, “Anutu wane papaiņo iwa yale ramaike, ‘Urumne ea eņe ęei ęerep kepe baņem ęine maguine maguine sarikei, eņane meņe meņen urum okaniake.’ ęine yale okanbimo, kobu ęei eņane mat okanmaike.”

<sup>18</sup> Yesu eɛe yale raki, Anutu wane papa togon welaine ɛei, Parisi, so Anutu wane mosop ɛei, Pris, eɛe dere more auye rakoi, “Nene dalino okane more qeɛem seukeake.” No, ɛei ɛerep eɛe korop Yesu wane kito ebo eboninane zonomineɛo detkau, zok manerop ewinerop okange, ea wane Parisi so Pris eɛe kaetongi, qeliɛkakoi.

<sup>19</sup> Ruo kereki naso yewao Yesu eɛine so dokoine eɛe Yerusalem qelige so ket arikoi.

### *Yesu Eɛe Eki Fik Wane Donkisi Kito Edange*

<sup>20</sup> Qaeki sakoka, eɛe ari kau, fik eki wele midaine yewa mo toroge okorake. Metine so ɛodine kaki korop marapke okorake. <sup>21</sup> Petoɛo eɛe Yesuɛo okange, ea detsoroke more Yesu olatke, “Kito ɛebo ɛebon, ge fik iwa kanom! Ge yatne soakkene, eɛe mo marapke okoramaike.”

<sup>22</sup> Yesu eɛe mainge rake, “Nine Anutu malipkau. <sup>23</sup> Nine maine bonaga iwa olale raikei, Ge wie more sontake ari kiwetko ketnom! Nine wet etkeka mi okane more, wet weku okane raikeiwo, welekatne donɛine welerop okaniake. Ea wane na ɛidanmaile. Kine kine ɛine yewaɛo raikei, rokop mawe wakoniake. <sup>24</sup> No, ɛine kine kine natne Anutuɛo ɛiboniakane meɛenkaikei, naso yewao ɛine Anutuɛo kine kine mo ɛibonge ea togoleka dere malipka more meɛenkaikei. Na welekatne ɛidanmaile. Nine yale malipka more meɛenkaikeiwo, Anutuɛo kine kine ea ɛiboniake. <sup>25</sup> Naso ɛine meɛen meɛen more okora more, ɛei maneɛo umat mane mo ɛinano make ea detsoroke more eɛane turuɛ yewa

qeliṅkawarekei. Yalawaka maganṅine weti qeliwo metmaike, eṅe ṅinane turuṅṅine yewa qeliṅgi nigetkayake. <sup>26</sup> Nṅo, ṅine ṅei ṅerep eṅane sot turuṅene mi qeliṅkau niget ṅuniakeo, maganṅine weti qeliwo metmaike eṅe yalawaka ṅinane sot turuṅṅine ea mi qeliṅgi nigetkayake.”

*Pris Edo Yesu Wano Rakoi, “Maṅo Ge Bira-gange.”*

<sup>27</sup> Yesu eṅine so dokoine eṅe zinge ari Yerusalem lotke more Yesuṅo Anutu Wane Bakom Urum kotino ari waket lolike geki Anutu papa togon welaine ṅei so Anutu wane mosop ṅei ṅetne so Yuda ṅei ṅetne eṅe Yesu wano sarikoi.

<sup>28</sup> Sari olale rakoi, “Ge eṅet biṅek so zonom ea diao ṅine manom paki, kine kine ea korop okan waremaine? Maṅo eṅet biṅek suaine ea gingane, ge urata ea ma okanmaine? Ge yatne Anutu wane Bakom Urum koto ṅine kine kine ea ma qakenom, korop saket warike, zonom eamo maṅo ṅingi, ge okanine?”

<sup>29</sup> Yesu eṅe mainge edange, “Na yaleka ṅine qeso qeson weku qeson ṅunbe, nanṅane qeso qeson yewa mainge nolatpi so na masi kine kine ea maṅane dereretko mamaile ea wane kine rawe desikei. <sup>30</sup> Yohane wane doku tau tau urata ea qeliwo ṅine wakonge, me ṅeiwo ṅine wakonge? Ea ṅido mainge nolatpi detpe.”

<sup>31</sup> Eṅe yale ra qeson ongi eṅe dere more enṅene auye rakoi, “Nene raikene ea qeliwo ṅine wakonge, yale ra olatṅem eṅe rayake, pakimo ṅine onoka wane ea mi dere malipkamami? <sup>32</sup> Me ṅene raikene, ṅeiwo ṅine wakonge, ea ranṅem

maine mi konapkeake.” Nei n̄erep ēje Yohane wane detkakoi, ēje Anutu wane qelit n̄ei wele, ea wane Pris ēje dere more kaetongi, <sup>33</sup> don iwa yale mainge Yesu olale rakoi, “Nene mi detmaine.”

Ēje yale rauso, Yesūjo edange, “Na yaleka, na maine mi mājo qeli ewe zonom ningi, urata ea mamaile, eamo mi n̄idanikale.”

## 12

### *Wain Eu Ware Ware Ējane Don Rokop*

<sup>1</sup> Yesu ēje don rokop natne iwa yale more edane rake, “Nei manejo wain eu ebore more sen pise qeare more, lom yaso tāj eājo wain woune lapelekeake, ea wane mauluke more mat bosin̄ine kiroine wetika weti maki yewa waki eu yewa warelukkake. Ēje n̄ei natne ējane meteenomotki edo urata yewa ware ma geu ējine qelige lobo kepe yewao ari geke. <sup>2</sup> Ēje yewa geki wain wele mena menāj nasoine okangi mo qelit medepine mane birakaki eu ware ware ējano wele natne manbi ma sariakane arike. <sup>3</sup> Pakimo, eu ware ware ēje wie qelit medep yewa malipka more kin̄ qun̄ kito osopkau, ēje metineka zinge arike. <sup>4</sup> Ariki, eu welaine ēje koso qelit medep mane birakaki ariki ēje yalewaka qe lewine rasipoke manerop matalikakoi. <sup>5</sup> Ēje soringe koso qelit medep mane birakaki ariki, ea yemo komu komune geu seukke. Eu welaine ēje n̄ei loutne biraongi ariu eu ware ware edo kawali ma wakone more n̄ei natne ziwem engukoi n̄o, natne komu komune seuseune engukoi. <sup>6</sup> Pakimo, ēje ējine gipole wemedep wekuku wetinējo malipka

geke. Ea wane eu welaine eje iwa yale detke. ‘NINE nae medep iwa wane anaine teweke more ewine kitokei.’ Yale dere more eu ware ware enano birakake. <sup>7</sup> Pakimo eu wane ware ware nei eje medep yewa ka more auye rakoi, ‘Medep yewa eje gemage magainane eu so kine kine eu koto pamaike, iwa nebu ma more ea wane welaine okane wareoniake. Ea wane nene qejem seukkiso nedo eu iwa welaine okane warekene.’ <sup>8</sup> Yale rau paki ma more qeu seukki parenjine ea eu nadinu birakau ketke.

<sup>9</sup> “Pakimo, eu welaine eje dalino okaniake? Eje sari eu ware ware yewa engu, rasu pelekki eje korop seuke midakei. Midau mo eje koso eu ware ware musele ma wakone biraoniake. <sup>10</sup> Na iwa don rokop ra qelajanmaile. NINE don nat paromine mane Anutu wane papiao mi dapore det okanmami mane?

‘Mat mama urata nei eje mat wane bosin mane ea eki pelekine ra more qikka yeine birakei. Wane nado eje koso kau mat wane banega bosin togogole okange. <sup>11</sup> Waom eje nado yale okangi, nene kanjem wekumane okaniake.’ ”

<sup>12</sup> Yale ra edangi, Yuda netne eje detpi Yesuno don rokop ea qeki, korop enanoka ariki rawaeke. Pakimo, eje Yesu malipka wokomkaikei wane wetkekoi no eje nei enane kaetonge, yalinane eje yeine qelinjka arikoi. Nei njerep ene Yesu wane don dere siminonge yewa wane Yuda netne eje kaetongi, Yesu qelinjka arikoi.

*Nei Edo Roma Kepe Ware Ware Suaine Takis  
Manikeiwane Yesu Qesonkakoi*

13 Yuda n̄etne ēje Anutu papa togon welaine n̄ei, Parisi, so Herot wane tego natne biraonbi Yesu wano arikoi. N̄ei yewa ēje Yesu dongo qe isikau, don mataliki, don uratao birakakei wane arikoi. 14 Eje ari more Yesu olale rakoi, “Kito ebo ebon, n̄ene ge detluk ganmaine. Ge isi don mane mi raraŋone, ge don wele rara wane n̄ei. Ge n̄ei mane wane mi kaetgan okanmai. Ge n̄ei n̄erep natne don mane edane more koso n̄ei n̄erep magu natne don mane mi edane okanmaine. Midakaka! Ge don wele so Anutu wane masi koboboine kito, n̄ei n̄erep iwa korop sikan n̄one okanmaine. N̄enze ra rokop donze ea wane ge dalino detmaine? Maine n̄ene takis Roma kepe ware ware suaine manikene me mida?”

15 No, Yesu ēje isisienane kine ea mo detone more edane rake, “Onoka wane n̄ine na liwek nanmami? Eso, yale wane n̄ine wesi yewa mane ma sariu kawē.”

16 Yale raki, ēje wesi mane ma more, Yesu wane osino ma sariu, ēje qeson one rake, “On̄aon̄a iwa so ējet iwa maŋane?”

Ēje rakoi, “Roma kepe ware ware suaine ējane ējet so on̄a on̄a.”

17 Pakimo, Yesu ēje donene mainge rake, “Roma kepe ware ware suainane bin̄ek kine kine ea maine ējine manikei, n̄o Anutu wane bin̄ek kine kine ea ēje ējine Anutu manikei.”

Yale raki, n̄ei magu yewa ēje Yesu wane don dere on̄aene qaeke, qiselukkoi, so dereret siuke.

*N̄ei Edo N̄ei Seuseuo N̄ine Wisikae Wie Wie Ea Wane Yesu Qesonkakoi.*

18 Yuda nei netne, Sadusi natne, eje Yesu wano sarikoi. Magu yewa eje yale raokangoi nei seuseune eje koso mi wiekei. Ea wane eje Yesu qesonka rakoi, 19 “Kito ebo ebon, sogino, Mosenjo nenze don mane iwa yale qeke. ‘Nei mane eje seukeake, eje medeune midaine, jo, nanomine eje yeka geake, pakimo nei seukke enane nole eje tatine qesinka more nrep yewa ojo koso ma more medep mane ma wakoniake.’ 20 Nenane donkisi detnom. Donkisi iwa eje tati non sewen(7) yale gekoi. Wane tatene suaine eje nrep ma ge more medep mane mi ma wakone eje yaup seukke. 21 Pakimo, nole kebanine ojo tatinane mala ea make. Eje yaleka medep mane mi ma wakone more eje seukki, nole norikine eje yalewaka okange. 22 Yalewaka tati non sewen(7) yewa eje nrep wekuka makoi, jo, medep mane mi ma wakone more, eje yaup seukwarekoi. Pakimo nrep yewa eje yaleka nado ban seukke. 23 Boan naso nei seuseune eje wisikae wiekei, yewao nrep yewa eje manane nrep binjek okaniake? Ge detmaine. Nei tati non sewen eje nanomene weku yewa makoi.”

24 Yesu eje mainge rake, “Nine Anutu wane papiao don pamaike, ea nine mi detlukmami. So nine Anutu wane zonomine ea nanaka more ea wane don yewa qeyau ramami. 25 Nei seuseune eje denesereo nine wisikae wiekei, naso yewao eje koso nao nanom mi okanikei. Midakaka! Eje qeliwo anelo yale gekei. 26 Nei seuseune eje wisikae wiekei, enane don yewa Mosenjo kibi qeke. Nine yewa mi dapotkoi me? Naso

yewao eki nigatnane kutno gerep zeke, eao yewa wane donkisi Anutuŋo Mose olatke, ‘Na Abraham wane Anutu, so Isak wane Anutu so Yakop wane Anutu okanmaile.’ <sup>27</sup> Anutu eŋe ŋei wisika gemami eŋane Anutu. Don ea wane kine iwa yale, Abraham, Isak, Yakop kepe solajo seukoi, ŋo oŋaonjaenerjo naso yewao wisika gemami! Anutu eŋe ŋei seuseune eŋane Anutu midakaka! Njine don yewa qeyau rawaremami!”

*Anutu Wane Rara Togon Iwaŋo Njetne Okanmaike*

<sup>28</sup> Yesu eŋe yale raki, eŋe don auye kitat metpi, Anutu papa togon welaine ŋei mane eŋe sari detkaki, Yesu eŋe don koboboine mainge edangi, eŋe Yesu qesonka rake, “Ge ranom! Anutu wane ra rokop don eŋano njine diawaŋo njetne okanmaike?”

<sup>29</sup> Yesu eŋe donine mainge rake, “Iwa yalenjo Anutu wane ra rokop don njetne okanmaike. ‘Israel ŋei njerep detpi! Waom eŋe njenane Anutu okanmaike! Eŋe waom wekuku!’ <sup>30</sup> Njine wet dereretnjine, so oŋa oŋa njine so zonomnjine korop Waom njine Anutu eŋane siminŋungi ma qotkau!”

<sup>31</sup> Anutu wane ra rokop don njetne yewa wane bano, koso mane etke okanmamik yemo, ‘Njine wetnjinejo njidomka ma qot nagugekei! Yalewaka ŋei njerepkopnjine korop wetnjinejo ma qotonikei.’ Anutu wane ra rokop etke yewa koso manenjo etke iwa mi yuan otmaike.”

<sup>32</sup> Anutu papa togon welaine ŋei yewa eŋe Yesu olale rake, “Kito njebon njebon ge don maine ramaine! Oo welekatne! Waom eŋe wekuŋo Anutu

okanmaike. Koso mane mi gemaiké. <sup>33</sup> Nene wet dereretze so oŋaonaze so zonomze korop Anutu wane siminŋongi, ma qotkanjem! So ŋenze wetzeŋo ma qotnagukene. Yalewaka ŋei ŋerep korop ma qotonikene. Nene ra rokop don etke iwa mogasikeneo, masi etke eaŋo Anutu wane bakom natne lama bulamakaŋo mire okanmami, ea korop yuan onikeik.”

<sup>34</sup> Yesu eŋe ŋei yewa don raraine detkaki weku mane koboboine ŋei dereret koropŋo ramami, yale mainge raki, detka more ŋei yewa olale rake, “Ge Anutuŋo ŋei ŋerep wareŋuniakane kine daleo ea detkenane qou qou okanmaine.”

Yesu eŋe don yale raki, ŋei ŋerep natne eŋe don natne Yesu qeson kaikeiwane kaetongi, koso don mane mi qesonkakoi.

### *Yesuŋo ŋei ŋerep Mesia Wane Kine Edange*

<sup>35</sup> Yesu eŋe Anutu Wane Bakom Urum koto mere ŋei ŋerep kito ebone more iwa yale rake, “Ŋo onoka wane Anutu wane papa togon welaine ŋei, Skribe, eŋe Mesia wane ramami, eŋe eŋineka Dawit wane ŋaboine, kepe ŋei eŋineka. <sup>36</sup> Mesiaŋo ŋei ŋerep ma menaŋ oniakane, Anutuŋo ma wakonkake. Anutu wane Asu Koboboineŋo Dawit dereret mange, pakimo, Dawit oŋom rake, ‘Magak Suaineŋo naŋane suaine Mesia iwa yale olatke, “Ge naŋane wonnoken mesikene, pakimo, noŋo ŋabakopŋone, eŋe biraonbe, geŋane banŋono mesikei.” ’ <sup>37</sup> Dawit oŋom Mesia wane eŋe suainene rake, wane mo eŋe daleo wane Dawit wane ŋaboine?”

*Yesuŋo Anutu Wane Papa Togon Welaine Skribe  
Nei Eņane Girem Don Nei Nerep Edange.*

Nei nerep magu suaine eņe Yesu wane don dere more, siminongi bakom kitokoi. <sup>38</sup> Yesu eņe iwa yale kito ebonge, “Nine Anutu wane papa togon welaine nei eņane kaulukonikei! Eņe takot kiroine kibinerop bira more arikei wane siminone okanmaike. So eņe lewalewan sobego taņ tuņ zarak zurak geu nei nerep edo one ma wa one more eweene kitou geokanmami. <sup>39</sup> Eņe Yuda lewa lewan urum koto so epa kebu eao met met neta mesikeiwane okan okanmami. <sup>40</sup> Eņe yale okane more nerep mala eņane mat oma one okanmaņkei. Omakone more eņe sari Yuda lewa lewan urum koto nei nerep eņane deo okora Anutu wano meņe meņen kiroroine meņenka okanmaņkei. Nei yaline yewa eņe gemage nado Anutuņo wikile suaine eboniake.”

*Nerep Mala Maneņo Anutu Bakomine Kitoke*

<sup>41</sup> Yesu eņe Anutu Wane Bakom Urum wane wesi katapa osino metke. Mere nei nerep one metki ari wesi katapa koto birau ketke. Nei wesi aboņene suaine loutne eņe wesi suaine motkoi. <sup>42</sup> Paki mo, nerep mala wesi aboņine nigatnemde eņe sari toea etke biraki ketke. <sup>43</sup> Ea wane Yesu eņe dokoine edoraki sariu edange, “Na welekatne nidanmaile, nerep mala njaone mo seu seune, aboņine nigatnemde eaņo wesi manerop motmaike, eņe nei nerep wesi aboņene suaine eņane bakom wane wesi motmami, ea yuanonmaike. <sup>44</sup> Nei nerep wesi aboņene suaine pake, ea nņine nigatnemde so natka Bakom Urum wane laseo

motkoi, ɲo ɲerep mala iwa eɲe zok wesi wane ziaɲ lulukke, ɲo eɲe koropka birawareke, eɲe wesiine mane doku ɲara qoleakane maune mi motki metke.”

## 13

### *Yesuɲo Anutu Bakom Urum Boriakane Rake*

<sup>1</sup> Yesu eɲe Anutu Wane Bakom Urum Suaine qelinɲa more ket ariki, dokoine eɲano ɲine manenɲo olale rake, “Kito ɲebo ɲebon, ge so Anutu Wane Bakom Urum, so eɲane urum ketkele weku mane, weku mane iwa onnom!”

<sup>2</sup> Yale raki, Yesuɲo mainge rake, “ɲine kau mat iwa zok suaine okanmaike me? Naso kutno ɲei ɲinane ɲei ɲaba eɲe mat iwa matalikeiwo, eɲe wesi mane mi qeligeu weti kutno mesiake, midakaka! Eɲe koropɲo saket din bun kitopoke qakeu ket ari wareake.”

*Yesuɲo Rake, “Umat So Wikile Loutne Wakoni-ake.”*

<sup>3</sup> Yesu eɲe Oliwa bonagao mere pore kaki Anutu Wane Bakom Urum nat metke. Yesu so Petoro so Yakop so Yohane so Andrea enɲeneka metkoi. <sup>4</sup> Mere more eɲe Yesu qesonka rakoi, “Ge ranom detɲem, naso dango Anutu Bakom Urum ea poripkeake? Onokaka kine kine manenɲo mikep wakone sikanɲongi, ɲene ea ka more raikene, Anutu Wane Bakom Urum mo wiriakane nasoine bomilemaike?”

<sup>5</sup> Yesu eɲe edane rake, “ɲei loutne eɲe sari isi ɲunikeiwane ɲine kaulukkei! <sup>6</sup> ɲei loutne eɲe sari more nanane eɲetne nora more raikai, ‘Na Kristo.’ Yale ra more ɲei ɲerep loutne isi

onikei. <sup>7</sup> Njine banj kawali suain suaine ea ukatneka desikei, so momo don, kawali natne kepe nat parom ramaike, ea dere mo qomjine misuk umareake! Kine kine yaline korop wakoniake. Njo, qeli so kepe nasoine yemo ikop mi qoeake. <sup>8</sup> Mat mane enje wie ari mat mane enjerop kawali yaku matali okanikei. Nei kepe maneo njine enjane nei waom enje ari kepe mane wane nei waom enjerop yaku matali getali okanikei. Kepe loutne memea suaine ma paki, njara wane bodi wakoniake. Nerep edo medep ebukeiwane gae kieke ebumaike. Naso yewao wikile yaline kieke wakoniake. <sup>9</sup> Nei edo sari njibu ari kaunsol enjano dongo bira njunikeiwane kauluk nagukei. Ene njine Anutu wane lewa lewanj urum koto zinge more, njibu ari birañunbi kepe ware ware enjane deo okorakei. Yewa njine binjek don ra edanikei. <sup>10</sup> Alakan, njine kepe banjem nei njerep korop enjane binjek don ra qelanjane edanikei. Pakiso, kepe qeli naso etne qoeake. <sup>11</sup> Nei edo njibu ari kaunsol enjano dongo bira njunikei, naso yewao njine dere mezet mi okane raikiei, 'Nene kaunsol dalino edanikene?' Ea mida! Njine enjane deo okorau, naso yewaka Anutuñjo dereret njino don mosiake, yewa njine ra qelanjanikei, eamo njidom mi raikiei, yemo Asu Koboboinenjo rayake. Anutu wane Asu enje wenenj njinerop okora njidangi edanikei. <sup>12</sup> Naso yewao nei mane enje tatine me njole ma ari kaunsol enjano dongo birakaki qeu seukeake. Yalewaka magak enje dokoene ebu ari kaunsol enjane dongo biraonbi enguwi seukkei. Yalewaka dokoetne enje naga magaene epu ari kaunsol

enano dongo biraotpi etkuwi seukkeik. <sup>13</sup> Nanjane enjetnejo njinano pamaike ea wane nei njerep korop ene njinane dere worik okanjonikei. Njo, nei ene togole binjek don malipka okorayakeo, Anutu ene qeli kepe qoiqoi nasoo nei yewa mayake.”

*Nei Madonj Madonjine so Matali Matali Kaetinerop Wakone Kaitko Okorayake*

<sup>14</sup> Yesuno iwa yale rake, “Njine Nei Madonj Madonjine so Matali Matali Kaetinerop kau Mat Kobekine, yewao wakone okorayake. Ene Anutu wane tun ma more isisine okorayake.” (Nei mane ene kibi iwa dapore kine detlukeake.) “Naso yewao nei njerep Yuda kepeo njine kaet okane biririke bonagao arikei. <sup>15</sup> Nei mane ene mat sekaino mesiake, ene mat koto mi wa more kine kine natne mayake, ene yeine qelige kaet ariake. <sup>16</sup> Nei mane ene euo geakeo njine, ene koso mi zinge ari matko momo takotine mayake, ene yeine qelige kaet ariake. <sup>17</sup> Njerep medep njat korop so medep abuburop, ene wikile suaine zok manerop desikei. <sup>18</sup> Njine Anutu menjenka olatpi, ‘Kine kine yewa koya momo naso misuk wakoni-ake.’ <sup>19</sup> Naso yewao umat kakapa suaine wakoni-ake. Anutuno qeli so kepe mat ma wakonge naso yewa so naso iwa gemaine, ea wane keuno umat kine kine wakonge ea korop umat iwanjo yuanka more wakoniake. Umat iwa qoeki njadino umat mane yaline mi wakoniake. <sup>20</sup> Njo Waom ene naso yewa wane umatine korop mi ma bomilemaikeo, yemo nei njerep korop mida lele warekene, Waom ene enjine nei njerewekoune biraonge, ea wane naso iwa ma bomilemaike.

21 “Naso yewao ɲei manenjo ɲidaniaike, ‘Neiwa Waomɲo ɲei ɲerewekoune ɲebuyakane, ea iwa kau, Kristo iwa metmaike!’ me ‘Kau! Eriwa metmaike!’ ɲine misuk dere malipkakei. 22 ɲei natne eɲe sari isinune more, iwa yale raikɛi, ‘Na iwa Waomɲo ɲei ɲerewekoune ɲibukalane biranange’, me raikɛi, ‘Na propet mane,’ yale ra, masi tanik kine kine, tanikine kine mane kine mane maikɛi, so isinunikei. Ea welekakatne, eɲe maine ɲei ɲerep Anutuɲo mo eɲine biɲek biraonge, ea isionikei. 23 Ea wane ɲine kaulukkei! Na don kine kine mo korop ɲidanwarile.”

### *Nado ɲei Wawainane Gipole Sariake*

24 Yesu eɲe koso iwa yale rake, “Umat kine kine suaine yewa midaki, naso yewao kepe deine mupkeki meso eɲe yaleka mi qelaɲaniaike. 25 Serekin eɲe qeliwo ɲine buratke ketpi, kine kine togole qeliwo eɲe korop qise warekei. 26 Naso yewao kau. Na ɲei Wawainane Gipoleɲo kezonj kutno qelaɲanne suaine so zonominerop wakone sarikale. 27 Naso yewao na ɲei Wawainane Gipoleɲo aɲelokopne biraonbe, qeli so kepe wazaino ɲine nat nat qei so weti ɲei ɲerep Anutuɲo mo ma wakone biraonge, ea aɲelokopne edo korop ebu sari qeturaɲ ɲonikei.

### *Yesu Eɲe Eki Fik Wane Kine Kito Ebonge*

28 “Na eki fik wane kine kito ɲidanbe desikei. Eɲane metine posi qake more musele yabiki ɲine ka more raikɛi kaiwe naso okanmaike. 29 Yalɛwaka ɲine fik kine kine qotkoine ea wakongi ɲine yale desikei, ɲei Wawainane Gipole nasoine mo bomile osop osop madetko

sarimaike. <sup>30</sup> Na welekatne njidanmaile, naso sariake, naso eao nei njerep naso iwao wane binjek ene mi seukeu, kine kine ea korop wakon wareake. <sup>31</sup> Kepe so qeli ere midakeik, no, nanane don yemo mi midayake.”

### *Nei Manenjo Ea wane Naso Mi Detkamaike*

<sup>32</sup> Yesu ene koso manerop rake, “Nei manenjo ea wane nasoine mi detkamaike. So qeliwo anjelo magu so Anutu wane Gipole ene yaleka mi detkamami. Magak Anutu onjomka detmaikeye.

<sup>33</sup> Ea wane, njine kauluke more ware gekei! Njine naso mi detkamami. Ma nasoo yewa wakoniake.

<sup>34</sup> Masi tanik iwa yemo nasoo ban yalewa wakoniake. Nei mane ene matine qelinjka more mat maneo ariakane okane more ene mat ware ware matokone biraongi edo enane kine kine warekei. Paki ene urata bonep bonep matoke biraone more nei mane anap wake waketko metke, yewa olale rake, ‘Njine diam togogole ma warekaikei!’

<sup>35</sup> Yalewa wane njine silun warelukkei! Njine mi detmami, ma naso mat wane welaine sariake. Njine mi detlukkamami. Ene ruo kereake nasoo me ruo keuno me kaiwe wetemaike naso eao me kepe qaeqawo sariake. Ea njine mi detlukkamami. <sup>36</sup> Mat welaine ene gege ikop sariki, qisekeiwane njine wisika mesikei. <sup>37</sup> Na don iwa njidanmaile eamo njine nei njerep korop njinane binjek. Njine koropno warekalukkei!”

## 14

### *Nei Netne Edo Yesu Qeu Seukeyane Rakoi*

<sup>1</sup> Kaiwe etke qoeki, aṅelo loloṅon loloṅon peada naso so bret patpale peada naso okange. Anutu mosop ṅei natne so Anutu wane papa togon welaine, ṅei eṅe auye rakoi, “ṅene dalino okane more Yesu sanku ma more qeṅem seukeake? <sup>2</sup> Eṅe rakoi, ea peada nasu suaino mi maikene. ṅei ṅerep eṅe dere worik okane more kawali ma wakonikei.”

*ṅerep Maneṅo Yesu Wane Lewetino Kelok Qoune Similerop Qakke*

<sup>3</sup> Yesu eṅe Betani matko Saimon wane matko metke. Saimon eṅe sogino ṅei kubetine weneṅ mere mo maneṅe. Yesu eṅe Saimon wane zakeo ṅara ne metki, ṅerep mane eṅe kelok qoune simlerop lewine suaine ea belon gorop ma sa more belon rasipoke more kelok qounerop Yesu wane lewetino qakke. <sup>4</sup> ṅei ṅerep natne metkoi, eṅe sotene osiki auye rakoi, “Onoka wane kelok qounerop sanda iwa matalimaike? <sup>5</sup> ṅei maneṅo kelok yewa qoleakeo wesi setne 300 yaline ma more, ṅei aboṅene midaine eboniake.” Ra more ṅerep yewa dere worik okankakoi so don manerop rakoi.

<sup>6</sup> Yale rau, Yesu eṅe rake, “Qeliṅkau! Onoka wane ṅine umat suaine mane ṅerep yewa don okankamami? Eṅe masi iwa weku mane nanano mamaike. <sup>7</sup> ṅei aboṅene midaine eṅe nasu baṅem ṅinerop gekei, ṅine nasu natneo eṅe mapikonbe ra ma okanikei, ṅo na yemo ṅinerop zok nasu kiroine mi gekale. <sup>8</sup> ṅerep eṅe kine kine mawe ra more maine mayake. Eṅe kelok qounerop solano

motmaike eje dejesereo wane ma ewek nanmaike. <sup>9</sup> Na welekatne njandanmaile. Kepe banjem korop eje Anutu wane binjek don ra qelajane more njerep iwa wane don kisi edane enjetine detsorokka more bukeu wayake.”

*Yudasjo Yesu Naba Enjane Meteeno Birakayakane Rake*

<sup>10</sup> Naso yewao dokoine 12 enjane keueno njine Yudas Iskariot eje mosop nei njetine enjane meteeno Yesu bira kayakane arike. <sup>11</sup> Eje dere more bakom kito more enjerop tako rakot don au more wesi manikeiwane olatkoi. Yudas eje dere more yewaka kieke Yesu ma wakon kayakane so meteeno mosiakane numaine mane dere maulukke.

*Yesu Eje Anjelo Lolojon Lolojon Nasoo Dokoine Enjerop Njara Nekoi*

<sup>12</sup> Bret patpalane soda weku kaiwe mane eao Yesu wane dokoine eje qesonka rakoi, “Ge detnom! Njine diawao ari mere Anjelo Lolojon Lolojon Naso wane njara maulukkene?” Kaiwe yewa nei njerep eje Anjelo Lolojon Lolojon Naso lama medeune koma banjem qe nemanjoi.

<sup>13</sup> Yesujo dere more dokoine etke biraore etange, “Njire ari Yerusalem matko waket more nei mane kauk doku kap teweke sari numao marat njusiake. Yewa mogatka ariuk, <sup>14</sup> eje ari mat wakesiake, yewa njire ari waket more mat welaine iwa yale olasikeik, ‘Kito njebo njebonze ramaike, nanjane mat anjone diawao Anjelo Lolojon Lolojon Naso na mere dokone enjerop njara nekene.’ <sup>15</sup> Yale ra qesonkauk, eje urum

ea aḡaone mane suaine kutno weti met met so zake kine kine mo mauluk maulukine, ea sikanḡutkiso, yewao ḡire ḡaraze maulukkeik.”

<sup>16</sup> Medewetkine etke ere ḡelige mat suaino ari lotke more Yesuḡo etange yale maratka more ere Aḡelo Loloḡon Loloḡon Naso wane ḡara kine kine maulukkoik.

<sup>17</sup> Rarapko, Yesu eḡe dokoine 12 ea weneḡ sarikoi. <sup>18</sup> Eḡe zakeo ḡara ne metpi, Yesu eḡe edange, “Na welekatne ḡidanmaile. ḡei mane ḡinane keuḡḡineḡo na ma wakonnane more, ḡabakopne eḡane meteeno bira naniake. ḡei ea eḡe weneḡ iwa narop mere ḡara nemaine.”

<sup>19</sup> Dokoine eḡe dere umare more weku weku Yesu ḡesonka rakoi, “Maḡo? Noḡo me?”

<sup>20</sup> Yesuḡo mainge rake, “Medep 12 ḡinane keuḡḡine eḡe iwa narop weneḡ mere metine biraki pletko ketki ḡara ma nemaik. <sup>21</sup> Na ḡei Wawainane Gipole seukkalane mo Anutu wane papiaḡo mo eḡe seukeake ramaike, Welekatne, ḡo ḡei yewa eḡe ḡei Wawainane Gipole na ma wakonnane ḡaba eḡane meteeno birananiake, eḡe yemo wet borik zok umat manerop marat kayake. ḡei yewa eḡe nabokḡo siluḡ mi makirap, paki eḡe umatine mi wakon mangirap.”

### *Yesu Eḡe Dokoine Ruo ḡara Gumeonge*

<sup>22</sup> Eḡe ḡara ne metpi paki, Yesu eḡe bret nat parom ma more Anutu wane bakom kito more mapoke dokoine ebone more rake, “ḡine mau! Iwa nae bikumne.”

<sup>23</sup> Paki, eḡe wain lase ma more Anutu wane bakom kito more ebongi eḡe korop newarekoi.

<sup>24</sup> Eje neu Yesuño edane rake, “Iwa mo nae wejemne, eaño tako rakot muselane binjek na korop qesin nuniakane qakkale. Anutuño wejemne ea wane ra more ninerop tako rakot geake.

<sup>25</sup> Na welekakatne nidanbe, na koso wain mane ninerop mi nene gemage, naso kutno Anutu wane qeli ewe zonom sariake, naso yewao wain musele kine mane nekale.”

<sup>26</sup> Yale edangi qoekiso, eje Anutu wane bakom enet mane kito more Oliwa bonagao arikoi.

*Yesuño Rake, “Petoroño Na Nadeknaniake”*

<sup>27</sup> Yesu eje edange, “Ñine korop mali malip ñine qororongi, na qelinane ariwarekei. Eamo Anutu wane papiano iwa yale ramaike, ‘Anutuño lama ware ware qeki seukki naso yewao enane lama korop ket gin qiririn yauyaup ariwarekei.’

<sup>28</sup> Ño, na koso wisikae wie more Galili ari alakane ñibonikale.”

<sup>29</sup> Petoroño olatke, “Natne eje korop ge qelin ganwareke, ño na yemo ge mi qelin ganikale!”

<sup>30</sup> Yesuño Petoro olatke, “Na welekatne golatmaile. Ukude ruo iwao tiak eje atak etke bokaki mi qoeki goño atak karewe bisop nanikene.”

<sup>31</sup> Petoro eje koso togogole mainge rake, “Geñone gekuwi seukkenom, na nekukeiwane okanbi, na ge mi bisopganikale.”

Dokoine natne korop eje yalewaka rakoi.

*Yesu Eje Getsemane Sauromoo Mejenkake*

<sup>32</sup> Eje Getsemane sauromoo ari lotke more, Yesuño dokoine edange, “Ñine iwa metpi, na ari mejenkaikale.” <sup>33</sup> Eje Petoro so Yakop so Yohane enerop edangi arikoi. Ari numao Yesuño

wet borik so umat kakapa suaine dere more  
<sup>34</sup> dokoine edange, “Wetne zok boriki, seukkalane okanmaile. Njine iwa diam metpi!”

<sup>35</sup> Ene eri eri kere more kepeo ket qurun rasu pa more, mejenkake. Ene wikile suaine ea maine yuankayake, ea wane dere more mejenkake.  
<sup>36</sup> Ene mejenka rake, “Oo magak! Ge wikile lase iwa korop maine omak nanikene? Kine kine korop, ge maine mi njanekene. Ge silun nanane simile mi mogasikene. Midaka. Ge gejone similejone mogare mawarekene.”

<sup>37</sup> Yale mejenkaki goeki, ene koso zinge ari dokoine karewe ongi kulu pau Petoro olale rake, “Saimon! Ge kulu pamaine me? Ge naso nigatne wet wisika maine mi gekene me?” <sup>38</sup> Ene edane rake, “Njine sot mi marat kakeiwane kauluk nagu more mejenkaiki. Onjanano mejen mejen wane togole ewekmaike. No, solano pelekmaike.”

<sup>39</sup> Ene yale ra edane more zinge koso ari mikip ra more mejenkake yalewaka mejenkake. <sup>40</sup> Paki koso zinge sari ongi dokoine ene kulu ka pakoi ea wane wie more deene umareki, gamuongi, Yesu wane don daleo olasikei ra dere umareu paki, mi mainge olatkoi.

<sup>41</sup> Yesu ene koso atak karewe zinge sari more edange, “Njine yeka kulu pa zonom mamami me? Moya maine! Nanane naso mo lotkemaik. Kau! Ene Nei Wawainane Gipole iwa mo nei sotenerop enane meteeno biranangei. <sup>42</sup> Njine wieu! Arinem! Kau, nei ma wakon naniake, mo iwa sari lotkemaik!”

*Yudasjo Yesu Naba Enane Meteeno Birakake*

<sup>43</sup> Yesu eņe yeka ra okoraki, dokoine 12 eņane keuo ņine Yudas eņe magu suaine eņerop lotkeke. Mosop ņei ņetne so Anutu papa togon welaine ņei so Yuda ware ware suaineņo ņei yauwine biraongi koak, soba ma more sarikoi. <sup>44</sup> Ғei Yesu ma wakonkayake, eņe magu yewa don masi mane edane rake, “Na ari ņei yewa ka more lulukiwe ka more raikei, Yesu mo yewa raso malipka more ma arikei.”

<sup>45</sup> Yudas eņe sari more ikopka Yesu wano ari more rake, “Kito ņebo ņebon.” Ra more lulukike. <sup>46</sup> Lulukiki so ņaba eņe ka more metino malipkakoi. <sup>47</sup> Eņane keueno ņine ņei maneņo Mosop Ғei Ғetne Suaine eņane qelit ņei mane osoeno okoraki, ea sobaņo qe more ketine rasu qakki ketke. <sup>48</sup> Yesuņo edane rake, “Na kobu ņei midakaka! Onoka wane ņine koak, so sobarop luknanikei wane sarimami? <sup>49</sup> Na kaiwe baņem Anutu Wane Bakom Urum kotino kito ņibone okanmaņkole. Naso yewao ņine mi malipnane luknangoi. Ғo, kine kine iwa wakongi Anutu wane papiao don ea wane wele wakongep!”

<sup>50</sup> Pakiso, Yesu dokoine eņe qeliņka more, ket giņ qiririņ ariwarekoi.

<sup>51</sup> Ғei qaluwit mane eņe laplapineka Yesu mog-are arike. Eņe ma more lukkaikei wane okanbiso, <sup>52</sup> laplap libeka ea qelige solaineka biririke arike.

### *Yesu Eņe Ғei Ғetne Eņane Kaitko Okorake*

<sup>53</sup> Eņe Yesu Mosop Ғei Ғetne Suaine eņane matko iwenka ariu ņei ņetne suaine korop sari lewaņgoi. Mosop ņei ņetne, Yuda ware ware so Anutu papa togon welaine ņei. <sup>54</sup> Peto-ro eņe Yesu

ɲadino mogare, aman ari Mosop Nei Nɛtne Suaine enjane mat wane sen koto waket more, tebe ɲei enjerop gerep qenagare metkoi. <sup>55</sup> Mosop ɲei nɛtne natne so ɲei nɛtne korop enj gube qesat ɲei natne maratka more Yesu dongo biraka more qeu seukeakane auye detokangoi. Nɔ, don mane wele koboine mi maratkakoi. <sup>56</sup> Qesat ɲei loutne Yesu wano zok don isi qesat okankakoi. Nɔ, doneene enj rau numainenjo wele so weku mi okange.

<sup>57</sup> Paki, ɲei natnenjo okora, don isi Yesu wane iwa yale solaino qe rakoi, <sup>58</sup> “Nene detkanjem, iwa yale rake, ‘Enj Anutu Wane Bakom Urum iwa metenjo makoi, yewa rasupoke qakewe ariki, na kaiwe mama karewe yewaoka mane musele maikale. Nɔ, metenjo mi maikale.’ ” <sup>59</sup> Nei enj don yewa rakoi, eamo numainoka mi rakoi, enj rau qebetnenjo mi kopkeke.

<sup>60</sup> Mosop Nei Nɛtne Suaine enj keuo wie okora more Yesu qesonka rakoi, “Ge enjane don turunjin mi mainge edanikene me?”

<sup>61</sup> Yesu enj donine midaki okora enjane don turunjin mi maingeke. Mosop Nei Nɛtne Suaine enj koso qesonka rake, “Nei njerep enj Anutu ewine kitomami. Ge welekatne Kristo, Anutu yewa wane Medep me mida?”

<sup>62</sup> Yesunjo mainge rake, “Oo, na yewa! Njine korop Nei Wawainane Gipole, Anutu Zonomine Kakapa Suaine, enjane metine nat wonino mere more qeliwo kezon kutno sariwe kaikei!”

<sup>63</sup> Mosop Nei Nɛtne Suaine enj qise qomine wieki takot kitopoke ma barake rake, “Nene koso qesat ɲei natne edoranjem sari enjane kine mi raikoi, yeine! <sup>64</sup> Njine detkau, enj Anutu ma

baikkamaike, ea wane njine dalino detmami, njene nei iwa daleo okankaikene?”

Paki, eje koropño Yesu wane iwa yale ra to-golekoi, “Eje sotinerop, eje maine seukeake.”

<sup>65</sup> Nei natne eje Yesu kieke sopotka more deine laplapño piseka ge more rakoi, “Ge ra qelanjikene! Maño gekumaike?” Yale olale more tebe nei edo mete tabeño qekoi.

### *Petoro Eje Yesu Bisopkake*

<sup>66</sup> Petoro eje qei mat wane sen koto metki, Mosop Nei Njine Suaine enjane qelit njerep eje sari more <sup>67</sup> Petoro kaki gerep qenagare metki deinoka olale rake, “Ge wenej sogino Yesu Nazaret njine enjerep gekone!”

<sup>68</sup> No, Petoro eje bisopka rake, “Na mi detmaile! Na enjane don mi dere qelanjamaile.” Yale mainge ra more eje mat wane sen ea wane madetino ari wakesiakane okangi tiak mane bokake.

<sup>69</sup> Qelit njerep yewa eje ka more nei osino okorakoi edane rake, “Nei iwa eje Yesu wane tego enjerep geke!” <sup>70</sup> No, Petoroño koso bisopkake.

Naso nigatne azongi, nei osino okorakoi, eje koso Petoro wane rakoi, “Welekatatne, ge Yesu wane tego gekone. Ge wenej Galili nei ge yewa njine.”

<sup>71</sup> Rauso, Petoro eje togogle bisopka rake, “Welekatatne weti qeliwo na njidanmaile. Na nei ea mi detkamaile. Na don welekatatne mi njidanikaleo, Anutu eje na wikile niniake! Nei yewa mi detkamaile.”

<sup>72</sup> Eņe yalewa rakiso, yewaka tiak eņe atak etke bokake, pakimo, Peto ro eņe Yesuņo don rake, yewa detsorokke. Yesuņo iwa yale rake, “Tiak atak etke bokaki mi goeki goņo na atak karewe bisop nanikene.” Don yewa detsoro ke more, Peto ro eņe zok manerop aro suaine aro ke.

## 15

### *Nei Edo Yesu Wane Pilat Kaitko Iwenka Arikoi*

<sup>1</sup> Kepe gae qaewo mosop űei űetne so Anutu papa togon welaine űei, Skribe, so Yuda ware ware űei so kaunsol korop eņe ikopka lewage more don ma togolekoi. Eņe Yesu metine mulap togoleņo lukka more iwenka ari Pilat wane meteo birakakoi. <sup>2</sup> Pilat eņe Yesu qesonkake, “Ge Yuda wane kepe wareware suaine me mida?”

Yesu eņe mainge rake, “Oo, mo yewa goņom ramaine yale.”

<sup>3</sup> Mosop űei űetne eņe don qesat manerop qesatkakoi. <sup>4</sup> Ea wane Pilat eņe koso qesonkake, “Ge don mane mi mainge raikene me? Ge detnom! Eņe don qesat loutne rau geņano sarimaike!”

<sup>5</sup> Yesu eņe eņane don dere more koso mi mainge rake, Pilat eņe oņaine qaeke.

### *Pilatņo Yesu Kibego Qekei Wane Rake*

<sup>6</sup> Aņelo Loloņon Loloņon wane Naso, Pilat eņe mulap űei mane qeliņkamaņke. Eņe űei űerep edom Pilat eņe mulap űei mane eņetine ora maņkoi, rokop qesonka eņe simileene mogare so qeliņkamaņke. <sup>7</sup> Naso yewao, űei mane mulap urumgo metke, eņetine Barabas. Eņe űei kawali qe more kepe ware ware yuanka more, űei natne

enguwi seukkoi, eñerop mulap urumgo waketkoi. Ñei magu yewa eñano ñine mane eñetine Barabas. <sup>8</sup> Naso yewao ñei ñerep magu eñe sari Pilat qesonka more, naso bañem okanmanke, yale mulap ñei mane qeliñkayakane olatkoi. <sup>9</sup> Pilat eñe qesonone rake, “Maine na Yuda wane kepe ware ware suaine iwa qeliñkawe ñinano sariake me mida?” <sup>10</sup> Eñe detke, mosop ñei ñetne eñe Yesu wane umat mane suaine mida, eñe yaup dere worik okane more eñane kaitko kine midaine ma wakone dongo birakakoi.

<sup>11</sup> Mosop ñei ñetne, pris, eñe ñei ñerep magu wetko ketket okane taleone more, Pilat wano rau, Barabas qeliñkaki, eñano sariakane rakoi. <sup>12</sup> Pilat eñe ñei ñerep magu koso qesonone rake, “Ñine ñei iwa Yuda kepe ware ware oramami, ea wane na dalino okanikale?”

<sup>13</sup> Eñe mainge boka rakoi, “Eñe kibego qeu!”

<sup>14</sup> Pilatño qesononge, “Onoka sotwane? Eñe umat dalino okange?”

Eñe zok manerop togoleka rakoi, “Eñe kiben qabego qeu!”

<sup>15</sup> Pilatño ñei ñerep wetene ma peseakane Barabas qeliñkaki eñano ariki Yesu kawali ñei magu eñane meteo bira kaki edo qe rasu qolok qe qolok mau paki, kumunam seleineño dime more, masi kine kine korop okanka more ñado kibego ma ari qekoi.

### *Kawali Ñei Edo Yesu Isi Bela Qebela Okankakoi*

<sup>16</sup> Kawali ñei edo Yesu kepe ware ware wane mat wane sen koto iwenka ari more eñane magu kawali ñei korop edorau arikoi. <sup>17</sup> Eñe Yesu kepe

ware ware takot birakakoi. Ene takot wenemka so marok okolerop ea lewino motkoi. <sup>18</sup> Ene Yesu wano isi bela qebela okanka ewine kito rakoi, “Oo! Ge Yuda kepe ware ware suaine naso kiroroina ge waikene!” <sup>19</sup> Ene zoronjo lewina qe more, sotkau pakiso wawetene qe more bakom isisine kitokoi. <sup>20</sup> Ene enane isi bela qebela don olatpi qoeki, takot wenemka yewa kitoqokka more enine takot enjo biraka more kibego qe kei wane iwenka arikoi.

### *Ene Yesu Kibago Qekoi*

<sup>21</sup> Ene dumao ari nei mane enetne Saimon, ene mat suaino wayakane sariki, ene maratka more sorinkau Yesu wane kibej qesinka tewekki arikoi. Saimon ene Sairini matko nine sarike, enane gipoletkine Alekzander so Rupus. Saimon ene, kawali nei edo ma more, qebinkau Yesu wane kibej tewekke. <sup>22</sup> Ene Yesu ma more kepe mane enetne Golgota yewa ma arikoi. Kepe enetne ea wane kine iwa yale, ‘Lewet Setnenane Kepe.’ <sup>23</sup> Ene yewao Yesu qelan qeakane ra more wain so qelan qe qe wane kinin yewarop maingekoi. Ea manbi, Yesu ene mi neke. <sup>24</sup> Pakimo, ene kibego qe more takotina, laplapine so maloine yewa wezu qe more yuane damo qe amanagukoi. <sup>25</sup> Sakoka, 9 kilok, ene Yesu kibego qekoi. <sup>26</sup> Ene kibej kutno kibi isi qesat don qe motkoi, “Yuda Wane Ware Ware Suaine.” <sup>27</sup> Ene kobu nei etke Yesu wane wazaino nat nat wenen kibego etkukoi. <sup>28</sup> Anutu wane papiao don mane iwa yale pamaike, ea wele wakonge, ‘Ene kobu nei enerop qe kei.’

<sup>29</sup> Nei ɲerep ari sari okane ka more, ebeene bonepke isi bela qebela okanka rakoi, “Ge Anutu Wane Bakom Urum kitopoke more, kaiwe karewe koso mane musele maikenane rakone. <sup>30</sup> Ea wane ge geɲone qesiɲnagu more kibego ɲine qelige qoe ket arinom!”

<sup>31</sup> Mosop ɲei ɲetne so Anutu papa togon we-laine ɲei eɲe yalewaka Yesu wano isi bela qebela don okanka more auye rakoi, “Eɲe ɲei ɲerep natne maine qesiɲonge, ɲo, eɲine maine mi qesiɲnagumaikē! <sup>32</sup> Eɲe, Kristo, Israel wane kepe ware ware suaine. Eɲe kibego ɲine maine qoe ketki ɲene ka more malipkaikene.”

Kobu ɲei etke ere weneɲ Yesu rop etkukoi, ere yalewaka Yesu don qotkoine olatkoik.

### *Yesu Eɲe Seukke.*

<sup>33</sup> Oɲabango kepe korop panamane paki, ari kepe deine zingeki rarapwano 3 kilok okange.

<sup>34</sup> Okangi, Yesu eɲe togoleka boka rake, “Eloi, Eloi, lema sabaktani?” Don kine iwa yale, “Anutune, Anutune ge onoka wane qeliɲnanmaine?”

<sup>35</sup> Nei ɲerep natne osino okorakoi, eɲe yewa dere more rakoi, “Detkau! Eɲe Elaiya oramaikē.” <sup>36</sup> Nei mane eɲe biririke ari more wain dokune tabainerop ea laplapɲo qe muruge more kudupko pise more piino neakane qe dege more rake, “Tomaka kaɲem! Elaiya eɲe sari more makokka birakaki kesiake me mida!”

<sup>37</sup> Yesu eɲe koso manerop togoleka boka more asuine saki, seukke.

<sup>38</sup> Seukki laplap suaine Anutu Wane Bakom Urum kotino okorake, ea keuoka buntuk wiri sari ketki qela qoeke. <sup>39</sup> Kawali ɲei eɲane ware ware

ene Yesu wane osino okorake, ene kaki seukki mo rake, “Welekakatne, iwa ene Anutu wane Gipole okanmaike.”

<sup>40</sup> Nerep natne ene aman okora kakoi. Enane keuo Maria Magdalena, so Salome so Maria mane, Yakobo ketkele orakoi, so Yosep erane nagaetne. <sup>41</sup> Sogino Yesu ene Galili metke, naso yewao nerep yewa ere Yesu qesinkakoik. So nerep natne ene Yesu wenen Jerusalem matko wakoi.

### *Yesu Wane Parejine Kezem Koto Motkoi*

<sup>42-43</sup> Rarapwano Yosep, Arimatea njine, ene sari more mi kaet okange, ene Pilat wano ari more Yesu wane parejine mayakane qesonkake. Yosep ene Yuda wane ware ware mane ewinerop. Ene Anutu wane qeli ewe zonom wakongi kayakane, ware ware gege tomaka geokange. Kaiwe yewao ene Qezareko met met wane bano nagapko kaiwe yewao nei nerep ene Qezareko met met ea wane kine kine maulukkoi. Ene qezareko urata mi makoi ea wane Yosep ene Pilat wano ari qesonkake. <sup>44</sup> Pilat ene ikke wie waki kito qokkaki, kawali nei netne oraki sariki qesonka rake, “Welekatne Yesu mo seukike me mida?” <sup>45</sup> Ene kawali nei netne enano njine dere more Yosep olale rake, “Ge maine parejine maikene.” <sup>46</sup> Yosep ene laplap mane libeka qoleke, yewao Yesu wane parejine makoke ket more kawetka more denesereo kezem koto motke. Lom yewa mo wesi weku suaine ea wano mau okorake. Paki, wesi suaine mane rodiŋkaki, ari anjane yewa kito won geke. <sup>47</sup> Maria Magdalena so Maria, Yosep wane nagaine ere ka more wareka metpik, Yosep ene Yesu denesereo dukkake.

# 16

## *Yesu Eje Koso Wisikae Wieke*

<sup>1</sup> Sodao Yuda nei qezarek naso goeki, Maria Magdalena so Salome so Maria, Yakop nagaine, eje kelok kine kine qounerop qolekoi, ea ma more Yesu wane parenjine tau kaikeiwane arikoi.

<sup>2</sup> Kepe qae qaewo Sodao ruoropka eje denesereo arikoi. <sup>3-4</sup> Eje dumao ari more enjene auye rakoi, “Maŋo qesiŋŋone more wesi suaine yewa denesere aŋaine kito wonge metmaike ea ma biraki saket ariki njene wakesikene?” Wesi yewa kakapa suaine, eje yale ra more ari pore kau, wesi suaine yewa mo rodigeu saket arike. <sup>5</sup> Eje denesereo ari waket more kau nei qaluwit mane wongoken laplapine libekaka bira more metke. Eje nei yewa kaikei wane zok kaetonge.

<sup>6</sup> Pakimo, nei yewaŋo edange, “Njine mi kaet nungep! Na detmaile. Njine Yesu Nazaret njine, eje mo kibego qimi, eje marat kaikei wane sarimami. Eje iwa mi pamaike. Mo wisikae wiike! Kau! Iwa motkoi, eŋane papaine iwa.

<sup>7</sup> Njine ari Petoro so dokoine natne edanbi, ‘Yesu mo alakan njiboniakane Galili arimaike. Njine ari more eje kaikei. Yesu eje mo rake.’ ”

<sup>8</sup> Nrep eje dere saket more, denesere qeliŋka more, qomene tij taŋ qe zonomene okoraki, kaet okane more, nei mane mi olatkoi.

## *Yesu Eje Maria Magdalena Wakonkake*

<sup>9</sup> Yesu eje Sodao sakoka wie more alakane Maria Magdalena wakonkake. Sogino Yesuŋo eŋano njine asu qotkoine 7 esoponge. <sup>10</sup> Maria eje ari Yesu dokoine yewa edange, eje mo wisikae

wieke. Eņe wet borik ma more aroke metkoi.  
 11 Eņe edane rake, “Yesu eņe mo wisikae wieke, na mo maratkele.” Nō, eņe Maria wane don dere more mi malipkakoi.

*Yesu Eņe Medewetkine Etkē Wakonotke*

12 Boaņ Yesu eņe ņei kuneņine so kait kine mane okane more ari Yesu eņine medep etke erano wakonotke. Ere mat suaine qelige more arikoik.  
 13 Naso yewao ere zinge ari more dokoine natne ea edane rakoik, “Nere Yesu maratkamaite.” Nō, eņe erane don yewa dere more mi malipkakoi.

*Yesu Eņe Dokoine 11 Kepe Baņem Ari Biņek Don Ra Qelaņanikiwane Biraonge*

14 Qoigoiwo Yesu eņe dokoine 11, eņe ņara ne metpi ari wakononge. Eņe ari wakonone more don gereune okanone edane rake, “Maria so medep etke na maratnanbi, na mo wisikae wiile. Yale ra ņidanbi ņine onoka wane eņane don mi dere malipkemi? Nine dereret ņine mo mau siukke.” 15 Eņe koso edane rake, “Nine korop kepe baņem ari more biņek don ņei ņerep maguine maguine eņano ra qelaņanikei. 16 Nēi mane eņe dere malipka more biņek don wane doku tauyakeo, ea Anutuņo maki geake. Nō, ņei mane eņe mi malipkayakeo, eņe Anutuņo eņane sot dere matalikayake. 17 Nēi ņerep malipka gekei, Anutu eņe eņane meteeno masi togogole eboniake. Eņe asu qotkoine eņane eņetko osopka more eņe don kine mane raikei. 18 Eņe koma suabit so qaru ea meteeneņo malipkaikēi me doku sunainerop nekeiwo, eņe mi seukkei. Eņe

maine gekei. Ene meteene zoma nei nrep enano more ebuwi menanoniake.”

*Anutuŋo Yesu Qeliwo Ma Wake.*

<sup>19</sup> Boan Yesu ene don edangi goeke, Anutuŋo ene qeliwo ma wa more birakake, birakaki, Anutu enine wonino metke. <sup>20</sup> Pakimo, dokoine ene korop kepe banem ari more enane binjek donine ra qelanane arikoi. Waom ene wenen mapitone more masi togogoleŋo nei nrep sikanone more, donene ea ma togoleke.

*Yesu Wane Tanik Manik Don Kisi Iwa Qoemaiké  
Mareko 16, 9-10*

<sup>(9)</sup> Nrep ene kine kine korop ka detokangoi, ea Petoŋo enine so kimakoune edangoi. <sup>(10)</sup> Pakiso, Yesu ene dokoine binjek don ebone more biraongi, kepe banem ra qelanane arikoi, Anutu ene binjek don qoiqoine midaine iwa motke. Nei mane dere malipkayakeo, ene gege togon marat kayake.

**Waom Yesu Wane Sigi Maep Don**  
**The New Testament in the Ono Language of Papua**  
**New Guinea**  
**Nupela Testamen long tokples Ono long Niugini**

Copyright © 1991 The Bible Society of Papua New Guinea

Language: Ono

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

---

PDF generated using Haiola and XeLaTeX on 11 Nov 2022 from source files dated 22 Nov 2019

646541a1-8d36-5993-802c-6bb850da5963